

**ZAPISNIK**  
**O RADU ČETVRTE RADNE SJEDNICE SKUPŠTINE KANTONA SARAJEVO**  
**ODRŽANE 08.02.2023.GODINE SA POČETKOM RADA U 09,00 SATI**

Četvrtu radnu sjednicu Skupštine Kantona Sarajevo otvorio je predsjedavajući Elvedin Okerić (u daljem tekstu predsjedavajući).

Sjednici je prilikom otvaranja prisustvovalo 25 zastupnica i zastupnika, a tokom sjednice su se priključili i ostali, kako slijedi:

**SDA - STRANKA DEMOKRATSKE AKCIJE**

1. Dević Mahir
2. Kalem Adi
3. Kapidžić Faruk
4. Selmanović Faruk
5. Viteškić Smiljana
6. Zahiragić Haris

**POLITIČKA ORGANIZACIJA "NAROD I PRAVDA"**

1. Ademović Kemal
2. Čampara Aljoša
3. Memić Arijana
4. Okerić Elvedin
5. Pabrić Rusmir
6. Vreto Elvis

**SOCIJALDEMOKRATSKA PARTIJA BOSNE I HERCEGOVINE**

1. Avdić Samir
2. Čengić Irfan
3. Čičić Davor
4. Magoda Kenan
5. Pekić Jelena
6. Stojanović Igor

**POLITIČKA ORGANIZACIJA GRAĐANA "NAŠA STRANKA"**

1. Bešlija Vildana
2. Handžić Vibor
3. Klarić Sanela
4. Melank Miomirka
5. Uk Nihad

**STRANKA ZA BOSNU I HERCEGOVINU**

1. Bandić Muamer
2. Gaković Elza

3. Gavrankapetanović-Smailbegović Fatima
4. Hodžić Admela

#### **DEMOKRATSKA FRONTA**

1. Zuhrić Albin
2. Hašimbegović Marijela
3. Pilav Ilijaz
4. Vujović Vedrana

#### **POLITIČKA ORGANIZACIJA/INICIJATIVA “ZA NOVE GENERACIJE”**

1. Marjanović Damir

Izostanak sa ove sjednice opravdale su zastupnice Sebija Izetbegović i Arijana Memić, dok su kašnjenje najavili zastupnici Hodžić Admela i Aljoša Čampara.

Nakon intoniranja državne himne, predsjedavajući je izrazio u ime Skupštine Kantona Sarajevo duboko saosjećanje sa narodom Turske i Sirije u povodu razornih zemljotresa, te zamolio sve prisutne da svako na svoj način oda počast stradalim žrtvama.

Također je najavio da će šefovi svih klubova stranaka koje participiraju u Skupštini KS održati sastanak u pauzi prve tačke dnevnog reda na kom će definisati zajedničku inicijativu prema Vladi Kantona Sarajevo da se izdvoje sredstva za pomoć unesrećenim građanima u Republici Turskoj i Siriji.

Potom je pozdravio zastupnice i zastupnike u Skupštini Kantona Sarajevo, članove Vlade Kantona Sarajevo, sve prisutne u sali, kao i predstavnike medija koji prate rad sjednice.

Na osnovu članova 72. i 73. Poslovnika Skupštine Kantona Sarajevo, Kolegij Skupštine Kantona Sarajevo je na sjednici održanoj dana 23.01.2023.godine utvrdio dnevni red, a isti je dopunio na sjednici Kolegija održanoj dana 03.02.2023. godine.

Prije no što je stavio dnevni red na glasanje, predsjedavajući je predložio zbog hitnosti realizacije da se tačka 4. dnevnog reda prebaci na mjesto tačke 2. dnevnog reda i isto je predložio na izjašnjavanje zastupnicima.

*Zastupnici su jednoglasno (24 „ZA“) prihvatili prijedlog predsjedavajućeg za zamjenu tačaka.*

*Potom je dao Dnevni red za Petu radnu sjednicu Skupštine Kantona Sarajevo, sa navedenom izmjenom, na izjašnjavanje i isti je usvojen jednoglasno (26 „ZA“) kako slijedi:*

1. Poslanička/zastupnička pitanja inicijative i odgovori;
2. Prijedlog Odluke o razrješenju premijera Kantona Sarajevo;
3. Nacrt Budžeta Kantona Sarajevo za 2023. godinu;
4. Nacrt Zakona o izvršavanju Budžeta Kantona Sarajevo za 2023. godinu;
5. Prijedlog Odluke o davanju saglasnosti Zavodu za izgradnju Kantona Sarajevo i Direkciji za puteve Kantona Sarajevo, za zaključivanje Ugovora o kupoprodaji privremenog objekta radi rušenja, između Kantona Sarajevo, Ministarstvo saobraćaja - Direkcija za

- puteve Kantona Sarajevo i Zavoda za izgradnju Kantona Sarajevo sa jedne strane i Tucaković Ilijaza sa druge strane, u svrhu izgradnje „IX“ transverzale - rondo u ul. Safeta Zajke, a u skladu sa Odlukom o usvajanju Okvira za otkup imovine i naknade radi realizacije projekta izgradnje gradskih saobraćajnica u Kantonu Sarajevo broj: 01-04-19714/21 („Službene novine Kantona Sarajevo“, broj: 18/21).
6. Prijedlog Odluke o davanju saglasnosti Zavodu za izgradnju Kantona Sarajevo i Direkciji za puteve Kantona Sarajevo za zaključivanje Ugovora o kupoprodaji privremenog objekta radi rušenja, između Kanton Sarajevo, Ministarstvo saobraćaja – Direkcija za puteve Kantona Sarajevo i Zavoda za izgradnju Kantona Sarajevo sa jedne strane i Tucaković Ilijaza sa druge strane, u svrhu izgradnje „IX“ transverzale – rondo u ul. Safeta Zajke, a u skladu sa Odlukom o usvajanju Okvira za otkup imovine i naknade radi realizacije projekta izgradnje gradskih saobraćajnica u Kantonu Sarajevo („Službene novine Kantona Sarajevo“, broj: 18/21 i 5/23);
  7. Prijedlog Odluke o davanju saglasnosti Zavodu za izgradnju Kantona Sarajevo i Direkciji za puteve Kantona Sarajevo za zaključivanje Ugovora o kupoprodaji bespravno izgrađenih objekata radi rušenja, između Kanton Sarajevo, Ministarstvo saobraćaja – Direkcija za puteve Kantona Sarajevo i Zavoda za izgradnju Kantona Sarajevo sa jedne strane i „Bosnaplast“ d.o.o. Sarajevo sa druge strane, u svrhu izgradnje „IX“ transverzale – rondo u ul. Safeta Zajke, a u skladu sa Odlukom o usvajanju Okvira za otkup imovine i naknade radi realizacije projekta izgradnje gradskih saobraćajnica u Kantonu Sarajevo („Službene novine Kantona Sarajevo“, broj: 18/21 i 5/23);
  8. Prijedlog Odluke o davanju saglasnosti za zaključenje ugovora o kupoprodaji bespravno izgrađenog stambenog objekta, štale, sušnice i plastenika sve izgrađeno na k.č 173, 174/1 i k.č 174/3, K.O. Kobilja glava, između Direkcije za puteve Kantona Sarajevo i Zavoda za izgradnju Kantona Sarajevo sa jedne strane i Sivac Saliha sa druge strane u skladu sa Odlukom o usvajanju Okvira za otkup imovine i naknade radi realizacije projekta izgradnje gradskih saobraćajnica u Kantonu Sarajevo („Službene novine Kantona Sarajevo“, broj: 18/21) radi rušenja u svrhu izgradnje saobraćajnice I transverzale, tunel Kobilja glava;
  9. Prijedlog Odluke o davanju saglasnosti Zavodu za izgradnju Kantona Sarajevo za zaključivanje Ugovora o kupoprodaji nekretnine označene kao k.č. broj 22 gradilište k.o. SP\_Sarajevo Mahala LXVIII, što po novom premjeru odgovara k.č. broj 2386/1 k.o. Sarajevo V, između Zavoda za izgradnju Kantona Sarajevo sa jedne strane i Univerziteta u Sarajevu sa druge strane;
  10. Prijedlog Odluke o davanju saglasnosti na Finansijski plan Javne ustanove „Služba za zapošljavanje Kantona Sarajevo“ Sarajevo za 2023. godinu sa Odlukom o izvršavanju Finansijskog plana Javne ustanove “Služba za zapošljavanje Kantona Sarajevo“ Sarajevo za 2023. godinu;
  11. Prijedlog Odluke o postojanju javnog interesa za osnivanje Javne ustanove Osnovna škola “ROSULJE” Vogošća;
  12. Prijedlog Odluke o osnivanju privatne srednje škole pod nazivom - Privatna međunarodna gimnazija QSI International School of Sarajevo – QSI Međunarodna kvalitetna škola Sarajevo;
  13. Prijedlog Odluke o davanju saglasnosti na prijedlog Ugovora o zakupu poslovnog prostora Poslovne zgrade KJP Centar “Skenderija” d.o.o. Sarajevo koji zaključuju Ministarstvo saobraćaja Kantona Sarajevo i KJP Centar „Skenderija“ d.o.o. Sarajevo.

Prije prelaska na realizaciju dnevnog reda, predsjedavajući je pozvao zastupnike da se izjasne o zapisnicima sa prethodnih sjednica koji su dostavljeni zastupnicima uz poziv za sjednicu.

*Skupština je jednoglasno (26 „ZA“) potvrdila Zapisnik sa Prve radne sjednice Skupštine Kantona Sarajevo održane 28.12.2022. godine.*

*Skupština je jednoglasno (26 „ZA“) potvrdila Zapisnik sa Druge radne sjednice Skupštine Kantona Sarajevo održane 30. 12. 2022. godine.*

## **TOK SJEDNICE**

Predsjedavajući je otvorio prvu tačku dnevnog reda u 9:26 sati i dao riječ prijavljenim zastupnicima.

### **AD – 1.**

#### **POSLANIČKA/ZASTUPNIČKA PITANJA, INICIJATIVE I ODGOVORI**

**Zastupnica Fatima Gavrankapetanović-Smailbegović je podnijela sljedeće (citiramo):** „Danas pokrećem inicijativu za osiguranje finansijskih sredstava za liječenje oboljelih od upalnih reumatskih bolesti u Kantonu Sarajevo. Inicijativu sam podnijela u pisanoj formi tako da ću danas samo navesti neke najvažnije činjenice. Predmetnu inicijativu pokrećem u koordinaciji sa nevladinim organizacijama i članovima porodica oboljelih od upalnih reumatskih bolesti. Osnovna bazna terapija je od velikog značaja za ove pacijente ali nažalost ona nije na esencijalnoj listi za ove oboljele pa njih ona mjesečno košta negdje između 350 do 500 konvertibilnih maraka. Liječenje sa biološkim lijekovima ne podrazumijeva terapiju za sve oboljele nego samo najurgentnije bolesnike, po strogim kriterijima i pravila struke i oni bi se na taj način pripremili za ovu terapiju. U Kantonu Sarajevo trenutno ima negdje oko 50 pacijenata koji su na listi čekanja za odobrenje ove terapije. Ona njih godišnje košta negdje od 12 do 15 000 konvertibilnih maraka. Mislim da je vrijeme da se reumatološki pacijenti riješi sistemski a ne projektno i ne ad hoc aktivnostima. Sigurnost i interesi pacijenata moraju biti prioritet. Nema niti jednog razloga da se ne osigura sve ovo što predlažemo inicijativom jer sigurno u Budžetu od 1, 2 milijarde konvertibilnih maraka ima dovoljno prostora da se osigura liječenje ovih zaista teških bolesnika, naših sugrađana“.

**Zastupnik Mahir Dević je podnio sljedeće (citiramo):** „Pokrećem inicijativu koju smo mi kao zastupnici dobili svi putem e-maila, a to radim već po treći put. Znači cijeli prošli mandat to sam uradio dva puta. Dobio sam ovdje jedno lažno obećanje od premijera da će ta izmjena zakona biti riješena u roku par mjeseci i nisam tražio da se Skupštinu o tome izjašnjava a tiče se legalizacija bespravno izgrađenih objekata u Kantonu Sarajevo. Ja evo po treći put pokreće inicijativu prema ne znam kome. Ne znam kojoj Vladi, ne znam kom premijeru, ne znam kojoj politici zaista u kojoj se mi nalazimo, ali evo apelujem u ime 30 do 40 000 građana Kantona Sarajevo da ne potrošimo ponovo cijeli mandat da se ovo pitanje ne riješi. Znači pokreće inicijativu da se obezbijedi svi zakonski uslovi u smislu izmjena i dopuna postojećeg Zakona da se po kategorijama vrijednosnim omogući legalizacija bespravno izgrađenih objekata na području Kantona Sarajevo. Obrazloženje. Nije istu kada vi treba da legalizirati bespravno izgrađen objekat u nekoj gradskoj opštini gdje ne znam neko napravio svoj objekat na nekoj komunalnoj infrastrukturi, što je potpuno opravdano da mu ne date takvu vrstu legalizacije. Znači nije to isto kao situacija nekog čovjeka na primjer u nekoj drugoj općini Kantona Sarajevo koji nije mogao na gradskom građevinskom zemljištu da dobije potrebne papire, dozvole iz tog razloga zato što nije imao riješeni imovinsko-pravni odnosi ,zato što je ta zemlja bila tamo ne znam 1 /150. U međuvremenu taj čovjek je proveo sve sudske ovaj procese, ne znam izlaganje katastarskog

zemljišta ili advokat mu to zemljište ovaj riješio, nalazi se na gradskom građevinskom zemljištu, ponavljam, i ova Skupština četiri godine nije u stanju da izvrši izmjenu zakona da mu omogući da on legalizuje barem na gradskom građevinskom zemljištu. A da ne pričamo ovdje o kategorizaciji poljoprivrednog zemljišta, šumskog zemljišta itd. Vrlo neozbiljno. Evo ja po treći put pokrećem ovu inicijativu, ne znam prema kome ovdje u ovoj Vladi zaista, jer ovo je očigledno jedan raštiman orkestar koji prema kome više to uputiti, ali mislim da mi kao Skupština ovo pitanje zaista trebamo riješiti. Evo dobili smo svi taj mail. Pošto sam ja to radio već dva puta i treći put ja to pokrećem prema Vladi Kantona Sarajevo“.

**Zastupnica Smiljana Viteškić je podnijela sljedeće (citiramo):** „Ja sam za današnju sjednicu imala jednu inicijativu i dva pitanja, međutim inicijativu u sličnom tekstu je već iznijela cijenjena kolegica Gavrankapetanović tako da ću ja samo ponoviti da smo u prošlom mandatu zastupnica Hasagić iz Stranke demokratske akcije podnijela istu inicijativu i da je imala usmeno obećanje ministra zdravstva da će se to riješiti, pa evo nadam se da će se bar u ovom mandatu riješiti jer liječenje oboljelih osoba od reumatoidnog artritisa. Moje zastupničko pitanje upućeno je ministrici za odgoj obrazovanje nekako u ovo vrijeme prošle godine donešena je Odluka o osnivanju Javne ustanove Institut za razvoj preduniverzitetskog obrazovanja Kantona Sarajevo u 2020. godini finansirana su 23 uposlenika, u nacrtu budžeta za 2023. godinu predviđeno je finansiranje 48 uposlenika. Pitanje je, koliko je uposlenika iz prethodnog Pedagoškog prosvjetnog zavoda ostalo u Institutu. Koliko je uposlenika angažirano u preraspodjelom, koliko putem konkursne procedure i da li u strukturi uposlenih ima zdravstvenih radnika, ako ima kojih, s obzirom da Kantonu Sarajevo ima više srednjih škola medicinskog usmjerenja i da li smatrate da neke poslove npr u sektoru za vannastavne i posebne programe, naravno i u drugim sektorima ipak treba voditi osoba zdravstvene struke? Za ovo pitanje želim pisani odgovor. A sljedeće pitanje usmeno da mi odgovori ja mislim ministar privrede. Na sred gradske saobraćajnice pristupni put Zetri postavljena je rampa te se na toj lokaciji vrši naplata parkinga. Prema informacijama koje raspolazu bilo za istu nije dobijena dozvola niti je istu moguće dobiti s obzirom da cesta pripada gradskim saobraćajnicama. Da li su pomenuti navodi tačni? Molim usmeni a naknadno i pisani odgovor“.

**Zastupnica Jelena Pekić je podnijela sljedeće (citiramo):** „Moja inicijativa se odnosi prema Vladi Kantona Sarajevo gdje tražim hitno poduzimanje aktivnosti ka povećanju finansijskih sredstava za jačanje Kantonalne uprave civilne zaštite i Direkcije za robne rezerve za djelovanje u slučaju nastanka prirodnih katastrofa i elementarnih nepogoda. I tražim od Vlade Kantona Sarajevo da se utvrdi stanje raspoložive opreme i spremnosti svih uključenih aktera za brzo djelovanje u slučaju nastanka prirodnih katastrofa i elementarnih nepogoda. I ovu inicijativu ponosim u ime Kluba Socijaldemokratske partije u Skupštini Kantona. Dakle svjedoci smo nemilih događaja u Turskoj i Siriji gdje je uslijed razornog zemljotresa poginulo hiljade ljudi preko desetine hiljada povrijeđeni, a teritorij Bosne i Hercegovine predstavlja jedan od seizmološki aktivnijih dijelova Balkanskog poluotoka i također znamo je li kakvi su zemljotresi bili u Banjaluci, Skoplju i tadašnjem Titogradu, ali u skorije vrijeme u Stocu, u Zagrebu, Petrinji, pa i na području Kantona Sarajevo kada su otvorena brojna pitanja djelovanja u vanrednim okolnostima i sigurnost stambenih objekata u kojima živimo. Ovdje je jako važno još želim ovaj istaći da se uključi sve organizacije i udruženja koja djeluju u oblasti zaštite i spašavanja stanovništva; Gorska služba spašavanja, Odred izviđača, Crveni krst, Dobrovoljna vatrogasna društva kako bi se uradila da još jednom ponovim analiza stanja opremljenosti gore navedenih službi ovaj za rad u u slučaju nastanka vanrednih okolnosti, analiza stanja i raspoloživosti šatora, kreveta, deka, vreća za spavanje, agregata i opreme za osvjetljenje i drugih neophodnih proizvoda u slučaju nastanka prirodnih katastrofa na bazi broja stanovnika u Kantonu Sarajevo i planirati obavezno povećanje finansijskih sredstava za nabavku gore navedenih proizvoda i što jako važno realizovati namjenska sredstva koja imamo pri Civilnoj zaštiti za date potreba u toku 2023. godini i da se uspostavi program redovne edukacije, obuke za gore navedene aktere. Svjesni smo

nadolazećih klimatskih promjena kada će i Kanton Sarajevo biti puno izloženiji prirodnim katastrofama, zemljotresima, poplavama, pojavama klizišta i požara. I odgovor tražim pismeno“.

**Zastupnica Danijela Kristić je podnijela sljedeće (citiramo):** „Ja za danas sam priprema jedan zaključak i molit ću zastupnike da se kasnije izjasne o ovom zaključku. Na osnovu člana 117 i 120 Poslovnika Skupštine Kantona Sarajevo predlažem da Skupština Kantona Sarajevo donese sljedeći zaključak:

"Obavezuje se Vlada Kantona Sarajevo i resorno Ministarstvo da utvrde i donesu prijedlog odluke o proglašenju udruženja koja direktno rade sa djecom sa poteškoćama u razvoju od posebnog interesa za Kanton Sarajevo".

Druga inicijativa podnosim inicijativu za produženje saobraćajnih traka za bočna skretanja gdje je to moguće na raskrscima glavne gradske saobraćajnice jer su nedovoljne dužine te automobili zbog toga zauzimaju još jednu dodatnu traku te se stvara dodatna gužva na raskrscima.

Još jedna inicijativa.

Podnosi inicijativu da se u Javni poziv za subvencioniranje rješavanje stambenog pitanja mladih, uslov da kupoprodajna cijena stana ili kuće, odnosno utvrđena vrijednost građevinskog dijela objekta u izgradnji ne prelazi iznos od 180 000 konvertibilnih maraka prema ugovoru o kupoprodaji stana ili kuće, odnosno rješenju nadležnog organa o uplati naknade za izgradnju skloništa povećana na iznos od 200 000 konvertibilnih maraka zbog povećanja cijene nekretnina, te da se Javni poziv proširi i na kategoriju samohranih majki“.

**Zastupnik Igor Stojanović je podnio sljedeće (citiramo):** „imam jedno pitanje za Kantonalnu inspekciju i za Ministarstvo prostorno, dakle koji reguliše izgradnju objekata. Radi se o sljedećem; svjedoci smo svi da na Trnovu, da u Trnovskoj opštini i na Bjelašnici imamo jednu ekspanziju izgradnje objekata i naravno da se vrlo često dešavaju nepravilnosti. U ime grupe građana postaviti ću sljedeće pitanje: zašto Kantonalna uprava za inspeksijske poslove Kantona Sarajevo nije postupila po zahtjevu za inspeksijski nadzor postavljenom od strane fizičkih lica vlasnika nekretnina, apartmanskih sadržaja na lokalitetu planina Bjelašnica, općina Trnovo, a čiji zahtjev se odnosio na kontrolu zakonitosti rada i postupanja općine Trnovo Služba za civilnu zaštitu, inspeksijske i zajedničke poslove u postupku kontrole izgradnje objekta od strane investitora GOVZA doo u Sarajevu. Obrazloženje: nekoliko fizičkih osoba vlasnika apartmana u objektu na lokalitetu planina Bjelašnica obratilo se u septembru 2022. godine općini Trnovo jer su smatrali da je objekat u izgradnji GOVZA doo Sarajevu da se radi o eventualnoj bespravnoj izgradnji dijela objekta koji ugrožava kvalitet stanovanja podnositelja zahtjeva za inspeksijski nadzor, odnosno da se radi o izgradnji suprotno odobrenju za građenje. Prethodno ovi podnosioci zahtjeva u skladu sa propisima o pristupu informacijama pribavili dokumentaciju u vezi izgradnje predmetnog objekta, urbanističku saglasnost, odobrenje za građenje, izvod iz prostorno planske dokumentacije Zavoda za planiranje razvoja Kantona Sarajevo, te su potom uočili da postoje odstupanja u izgradnji predmetnog objekta od karakteristika objekta čija izgradnja je dozvoljena. Općina Trnovo je obavijestila podnosioci zahtjeva da je dokumentacija na osnovu koje se vrši izgradnja predmetnog objekta sačinjena u skladu sa važećim propisima, pri tome općina Trnovo je potpuno svjesno ili nesvjesno zanemarila činjenicu da se pomenuti podnosioci zahtjeva za inspeksijsku kontrolu nisu žalili na valjanost dokumentacije o izgradnji objekta nego na objekat koji je izašao izvan gabarita. Kantonalna uprava za inspeksijske poslove je poduzela određene aktivnosti koje su rezultirale nesuvislim i neprimjerenim odgovorom da su u postupku pribavili informaciju od općine Trnovo prema kojima je donošenje dokumentacije za izgradnju izvršeno u skladu sa važećim propisima, te da će postupak inspeksijskog nadzora biti nastavljen od strane inspekcije Trnovo. Obzirom da su podnosioci zahtjeva za inspeksijski nadzor jasno naveli da ne traže kontrolu valjanosti dokumentacije za građenje nego da traže kontrolu izvedenih radova, kontrolu da li su radovi izvedeni u skladu sa odobrenjem za građenje, odnosno da li je investitor

odstupio od odobrenih karakteristika objekta u smislu gabarita, izgleda etaža. Također sam dobio neposredno pred sjednicu informaciju da je inspektor u Opštini Trnovo koji je radio na ovom predmetu faktički smijenjen sa pozicije i ja očekujem da se naša Inspekcija uključi u ovaj predmet kako bismo stali u kraj gradnji izvan dozvola koje imamo u Trnovu“.

**Zastupnik Nihad Uk je podnio sljedeće (citiramo):** „Zbog dinamike same sjednice i važnosti akta današnjeg Nacrta budžeta jednu inicijativu ću pročitati a ostatak ću dostaviti putem meila. Dakle pomenuta inicijativa glasi da se obilježi autobuska stajališta adekvatnim znakovima sa popratnim informacijama o nazivu autobusnih linija. Svjedoci smo da Vlada Kantona Sarajevo u prethodnom mandatu je veliki fokus stavila na saobraćaj u Kantonu Sarajevo i jako dobro ide to, radi se faktički o istorijskim projektima koji su u ovom u kontekstu usmjereni u tramvajski saobraćaj, mijenjanje tramvajskih pruga i stajališta na tramvajskim prugama. Međutim postoje određena autobuska stajališta a veliki broj takvih stajališta je u samom centru grada koja nisu nikako označena ni informacijom da se radi o autobuskim stajalištima niti informacijama o kojim se linijama vozi na tim na tim stajalištima. Tako da to stvara problem. Neko od građana koji često koriste autobus kao sredstvo kretanja s obzirom da je manje-više poznato njima gdje su stajališta, s druge strane stvara problem građanima koji ne koriste autobus kao sredstvo kretanja često ili turistima, posebno u kontekstu kada imamo sada i dosta komercijalnih linija prema Hrasnici, prema aerodromu, stvara se određena zabluda kod njih, pa bih molio resorno Ministarstvo i resornog ministra da u narednom periodu obilježimo ovakva stajališta kako ne dolazi do sličnih zabluda.“.

**Zastupnik Faruk Selmanović je podnio sljedeće (citiramo):** „Imam 2 pitanja za našu uvaženu ministricu Hotu, a odnosi se na Nacrt zakona o odgoju i obrazovanju u Kantonu Sarajevo. Naime Zakon je dobio saglasnost, Nacrt zakona je dobio saglasnost Skupštine Kantona Sarajevo i prošao je javnu raspravu, te pored toga je poslan dopis prema institutima, Vijeću roditelja, školama da se u roku od svega 3 dana izjasni da li su za skraćenje časa, nastavnog časa sa 45 minuta na 40. Moje pitanje je da li je za ovo urađeno neka naučna analiza, to jeste da li je koncentracija učenika smanjena, da li je smanjen obim gradiva i da li se vodilo računa o fondu sati koji će nastavnici imati, jer ako se ovo sve sabere mislim da na nivou godine će faliti jedan dan. I molim da mi se o ovome pismeno očituje“.

**Zastupnik Damir Marjanović je podnio sljedeće (citiramo):** „Idemo par brzih pitanja prema Ministarstvu za visoko obrazovanje, nauku i mlade. Prvo pitanje što je urađeno i da li je riješen problem studenata Stomatologije? Koliko imam informaciju već dolazi na naplatu i druga rata. Imao sam priliku da se raspitam kod kolege iz Univerziteta u Sarajevu, oni su rekli da je osnovni problem u resornom Ministarstvu i u Zakonu onakav kakav je usvojen. Podsjetit ću prilikom usvajanja Zakona prošle godine skrenuo sam pažnju na to da će za realizaciju tog Zakona trebati određena budžetska sredstva iako je u rješenjima nadležnih Ministarstva rečeno da neće trebati. Molim vas da mi se odgovor usmeno na ovo pitanje. Drugo pitanje prema opet istom Ministarstvu. Što se dešava sa studentima Američkog univerziteta? Vjerujem da vam je poznata ta priča o čemu se radi. Što je Ministarstvo uradilo? Znam da je trebao biti sastanaka. Da li su održani sastanci sa predstavnicima studenata i u kojem pravcu ide to razrješenje problema, jer se radi o dječacima i djevojčicama iz Kantona Sarajevo koji su ostali skraćen za svoja osnovna prava. Da vidimo što Ministarstvo radi da riješi taj problem? Treće pitanje je vezano uz jednu Uredbu, jako je zanimljivo, nekako povezujem sa pitanjem koje sam postavio prošli put vezano za naplaćivanje komunalnih pristojbi, zovite kako god hoćete, računa prema apartmanima koji se nalaze na jednoj od olimpijskih planina, pa smo ustanovili da bez obzira što se radi o nekim zvaničnim apartmanima naplaćuje se kao da se radi o stambenim objektima tj. kao da se radi u kućanstvima. U međuvremenu umjesto odgovora na to pitanje vidim da je 26.01. donesena Uredba o izmjenama i dopuni Uredbe o opštim uslovima za proizvodnju i isporuku i korištenja toplotne energije gdje je Vlada, potpisuje premijer Edin Forto, uvela novu definiciju koja se zove apartman u članu 1, da je to poseban dio stambeno- poslovnog ili stambeno poslovnog objekta

koji ima status stambenog prostora. Znači na taj način apartmani su koliko mogu da shvatim izjednačeni sa stambenim prostorom, pa postavljam pitanje da li je ova Uredba u skladu sa Zakonom prostorno uređenje Kantona Sarajevo? Da li ovom izmjenom Uredbe između ostaloga se na neki način sada smanjuju mogućnost naplate i smanjuju iznosi koji bi trebali da budu naplaćeni od strane Kantonalnih preduzeća? Da li se ova Ured odnosi na sve apartmane koji se nalazi na području Kantona Sarajevo i da li i na koji način ovakvom smanjenom naplatom se utječe na relativno visoke račune koje i dalje dobijaju građani a vezano za toplotnu energiju za sve one komunalne komunalne račune koji nam dolaze? I na kraju, jedna inicijativa, malo ću se povezati sa gospođom Pekić , s kolegicom Pekić koja je iznijela odličnu inicijativu vezano za Civilnu zaštitu i za sve ono što se dešava. Ne znam koliko vam je poznato, mi plan evakuacije stanovnika Kantona Sarajevo, koliko je meni poznato, nije odavno updejtiran, kada govorimo o bilo kakvim velikim nesrećama. Mi smo imali priliku da vidimo što se dešava i u Turskoj i u Siriji i što se dešavalo u nekom bližem okruženju. Postavljam pitanje Civilnoj zaštiti prvo, kada je zadnji put updejtiran plan evakuacije građana Kantona Sarajevo i drugo, u kojoj formi se taj plan evakuacije nalazi u kojoj formi je dostupan građanima Kantona Sarajevo. I s tim u vezi pokrećem inicijativu da se taj plan kada se updejtira ili ako se updejtira da se digitalizira i da bude dostupan u 21. stoljeću svim građanima Kantona Sarajevo kroz onaj način komunikacije koji je najčešći, to je digitalni način, putem mobitela, računara ili drugih mreža. Znači molim usmene odgovore na sva postavljena pitanja a svakako ako ne dobijem usmene tražit ću pismene“.

**Zastupnica Sanela Klarić je podnijela sljedeće (citiramo):** „Ja imam jednu inicijativu i jedno zastupničko pitanje pripremljeno za danas. Zastupnička inicijativa govori o tome da ustvari iniciram za trajno rješenje održivog upravljanja građevinskim otpadom prema Ministarstvu komunalne privrede, infrastrukture, prostornog uređenja, građenja i zaštite okoliša, Zavoda za planiranje razvoja Kantona Sarajevo i Javne ustanove odnosno Javnog preduzeća RAD, da se izradi studija zbrinjavanja građevinskog otpada na održiv način, da se planira izgradnju reciklažnih dvorišta i odlagališta, donošenje standarda i propisa o građevinskim materijalima kojima se upravlja, i s druge strane pripremi smjernice za zeleno održivo građenje kojem bi se što više koristili upravo ti građevinski materijali koji dolaze iz otpada a koji mogu biti važni resursi. Ovo je sve u skladu sa zelenim dogovorom Sofijskom deklaracijom koju je Bosna i Hercegovina potpisala. Imamo dosta veliki broj i samih javnih trenutno projekata sa kojima imamo ogromnu količinu građevinskog otpada kojima upravlja i sama Vlada Kantona Sarajevo, naravno i privatne inicijative. Postoje određeni pravni okviri na federalnom nivou i Kantonu Sarajevo, ali nisu usklađene sa posljednjim zahtjevima održivog razvoja, a s druge strane sve je polovično napravljeno tako da građevinske firme imaju ogroman problem jer imaju zahtjeve ali nemaju infrastrukturu i rješenje na koji način da odlažu otpad. S druge strane niko ne vidi taj otpad kao resurs da se od tog otpada mogu raditi novi inovativni građevinski materijali koji već i u svijetu postoje i iz tog razloga možemo podržati i otvoriti nova radna mjesta. Što se tiče mog pitanja konkretno se odnosi na inicijativu odnosno Rezoluciju koju je Kanton Sarajevo odnosno ova Skupština ovaj usvojila 17. juna 2021. godine, a to je Rezolucija za unapređenje zraka u zatvorenim prostorima. Jednoglasno je usvojena i tada je obavezana Vladu da formira jednu interdisciplinarnu radnu grupu koja je sastavljena od članova ministarstava koji su uključeni ali i javnih institucija i naravno međunarodnih i domaćih nevladinih organizacija i stručnjaka jer ovo vrlo važno pitanje koje treba da riješi akcioni plan za zaštitu djece i mladih osoba od zagađenja zraka u zatvorenom prostoru ,nacrte Zakona o kvalitetu zraka o građenju i naravno puno drugih podzakonskih akata. Važno je reći da je ova Rezolucija plod istraživanja naučni koji su rađeni zajedno sa Medicinskim fakultetom i drugim ovaj članicama Univerziteta Sarajevo i drugih univerziteta, privatnih u Sarajevu kojima je pokazano i dokazano da je kvalitet zraka u vrtićima i školama katastrofalan, da jako loše utiče na zdravlje i na akademski uspjeh naše djece. Iz tog razloga ova Rezolucija je usvojena, međutim skoro, znači više od godinu i pol dana ja nisam upoznata da je nešto urađeno i molim pismeni odgovor na koji način se Vlada odnosno Ministarstva odnose na ovu Rezoluciju“.



**Zastupnik Faruk Selmanović je podnio sljedeće (citiramo):** „Ja imam 2 pitanja i oba se odnose za Ministarstvo za socijalnu politiku Kantona Sarajevo. Molim da nam se usmeno objasni zbog čega je i na osnovu kojeg zakonskog propusta obustava, urađena obustava isplate naknade za određen broj porodilja u Kantonu Sarajevo iako imaju izdata i važeća rješenja. I da nam se pojasni zbog čega je izvršena obustava isplate naknadu za porodice sa troje i više djece gdje roditelji ne žive na istoj adresi ili nisu prijavljeni na istoj adresi. Hvala. Usmeno, usmeno naravno“.

**Zastupnik Davor Čičić je podnio sljedeće (citiramo):** „Ja bih danas podnio jednu inicijativu za Ministarstvo saobraćaja Kantona Sarajevo a tiče se uvođenja u pravo korištenja elektronske iskaznice besplatne godišnje karte za gradski prijevoz za djecu i odrasle osobe sa invaliditetom, i to da se osobe s invaliditetom kada ne spadaju kategoriju osoba koje imaju iskaznice po drugom osnovu uvedu u pravo korištenja elektronske iskaznice i besplatni godišnji kupona za prijevoz gradskim saobraćajem i da se pratioci osoba s invaliditetom kojima je potrebna tuđa pomoć u kretanju i komuniciranju uvedu u pravo korištenja elektronske iskaznice te besplatne godišnje kupone koji mogu koristiti za vrijeme pružanja usluge odnosno kada su u pratnji osoba ili osobe sa invaliditetom. Obrazloženje: elektronske iskaznice i mjesečne godišnje kupone trenutno koriste različite grupe stanovništva po različitim osnovama, radni i socijalni status, uzrok nastanka invaliditeta. Ovakav način korištenja prijevoza osim što olakšava korištenje prijevoza putnicima jeftinije ili besplatan prijevoz pojednostavljuje i prijevoz putnika odnosno brzinu kontrole karata. Vozila Gradskog saobraćaja su uglavnom nepristupačna osobama s poteškoćama u razvoju i funkcionisanju te kada i ako koriste gradski prijevoz primorani su ući u vozila na druga ili treća vrata što onemogućava korisnika prijevoza da kupi kartu kod vozača. Nadalje djeca i odrasle osobe s invaliditetom veoma često su izrazito lošeg ekonomskog statusa zbog nemogućnosti za rad, te dodatnih troškova lijekova, terapija i slično. Osobe s invaliditetom, odnosno djeca i odrasle osobe koji imaju visok stepen fizičkog onesposobljenja, mentalne poteškoće, kombinovane smetnje zahtijevaju tuđu njegu i pomoć u životnim aktivnostima. Tuđa pomoć je posebno potrebna u kretanju odnosno korištenju gradskog prijevoza, stoga predlažem da se pratioci osoba s invaliditetom kojima je neophodna tuđa pomoć u kretanju i komuniciranju uvedu u pravo korištenja elektronske iskaznice i godišnjeg besplatnog puna uz adekvatan dokaz tj. rješenje o invaliditetu, tuđa njega i pomoći i rješenje o starateljstvu ili izjava da je osoba pratioc osobe sa invaliditetom. I naravno da se navedene iskaznice odnosno da kuponi važe kod svih službi gradskog prijevoza; Grasa, Centrotransa, Željeznica Federacije BiH itd. Stoga podnosim ovu inicijativu Ministarstvu saobraćaja i očekujem pismeni odgovor“.

**Zastupnica Elza Gaković je podnijela sljedeće (citiramo):** „Ja za danas imam dvije zastupničke inicijative koje ću pročitati i 2 zastupnička ovaj pitanja. Prva zastupnička inicijativa, u periodu od par dana na Dobrinji na istoj lokaciji nažalost automobilom su udarena dva pješaka. Na ovaj problem upozoravalo se u ranijem periodu ali značajno se ništa nije poduzelo kako bi se ovaj pješački prijelaz na spoju ulica Salke Nezečića i Grada Bakua učinili bezbjednim za svakodnevnu upotrebu građana. Iniciramo da se na pomenutoj lokaciji ograniči kretanje automobila na brzinu od 50 km/h i da se postavi radarska kontrola. Ovaj pješački prijelaz jako je frekventan i koristi ga veliki broj školske djece, te shodno tome zamolit ću nadležne da što brže reaguju. Moja druga zastupnička inicijativa, Javna ustanova Zavod za zdravstvenu zaštitu žena i materinstva Kantona Sarajevo je zdravstvena ustanova čija je djelatnost zaštita reproduktivnog zdravlja žena i materinstva na primarnom nivou zdravstvene zaštite i specijalističko konzultativna dijagnostika. Obzirom da smo svjedoci nažalost čestih teških dijagnoza a u nedostatku opremljenosti lokaliteta novi dispanzerski centar Otoka iniciram kupovinu ultrazvučnog aparata sa 3 sonde za potrebe lokaliteta novi dispanzerski centar Otoka. Nabavka ovog ultrazvučnog aparata pacijenticama sa područja općine Novi Grad Sarajevo pružila bi se kompletnija i kvalitetnija ginekološka i radiološka zdravstvena usluga.

Zastupnička pitanja. Pitanje je za ministra zdravstva odnosno zdravlja da li je istina da Zavod za javno zdravstvo Kantona Sarajevo sada dok još traje epidemija i zbog važnosti nadzora nad zaraznim bolestima nema rukovodioca Službe za epidemiologiju niti voditelj odjela zaraznih bolesti? I

da li je istina da u Kantonu Sarajevo nema antirabicne vakcine dok svi drugi Kantoni imaju? I zašto Zavod za javno zdravstvo nije nabavio tu vakcinu, niti vakcinu za pneumokok? Da li je istina da pomenute vakcine posuđujemo od drugih Kantona? Molit ću za ovu pismeni odgovor“.

**Zastupnica Vildana Bešlija je podnijela sljedeće (citiramo):** „Prva inicijativa je inicijativa za uspostavljanje programa obezbjeđenja biološke terapije za liječenje osiguranih lica oboljelih od psorijaze u Kantonu Sarajevo. Ovo je inicijativa Udruženja psorijatičara Bosne i Hercegovine. Inače psorijaza je hronična, sistemska, inflatorna, autoimuna bolest, često udružena sa drugim oboljenjima. Kod oko 30 % pacijenata sa psorijazom razvija se i psorijatični artritis. To je hronična i neizlječiva bolest i kao takva stigmatizira oboljele i utiče na sve komponente života a dokazan je negativan uticaj na svakodnevne aktivnosti, rad i društveni život sa mogućom pojavom depresije i drugim psihološkim problemima. Konvencionalnom terapijom je moguća uspješna terapija kod 70 % pacijenata, međutim vrlo često zbog neadekvatno nepravovremenog liječenja imamo pacijente kojima samo može pomoći biološka terapija i ovo su vrlo učinkoviti lijekovi u poređenju sa konvencionalnom terapijom u pomenutom slučaju. U Kantonu Sarajevo u 2018. godine postoji program obezbjeđenja biološke terapije za liječenje osiguranih lica oboljelih od reumatoidnog artritisa i sličnih oboljenja kojima se uz finansijsku podršku Zavoda zdravstvenog osiguranja, a po odluci Zavoda i Ministarstva liječe oboljeli od navedenih bolesti. Ali podnosim inicijativu da se uspostavi program za liječenje pacijenata od psorijaze u Kantonu Sarajevo uz obezbjeđenje biološke terapije. Druga inicijativa se odnosi na postavljane naljepnica sa uputstvom o postupanju u slučaju seksualnog uznemiravanja u vozilima javnog prijevoza i taksi vozilima. Naime prije godinu dana Sarajevski otvoreni centar je imao sličnu akciju u sredstvima javnog prijevoza i tim povodom obilježavanja prava žena i 8. marta kao Dana žena ova aktivnost je imala dobar odziv i smatram da je veoma korisna i tim povodom u saradnji sa Sarajevskim otvorenim centrom predlažem da ovaj vid edukativnih korisnik korisnih informacija bi mogle i u suštini trebale biti dostupne svaki dan i svim građanima Kantona Sarajevo sa koracima odnosno uputstvom koje treba poduzeti u slučaju uznemiravanja u bilo kom javnom prevozu ili taksi vozilima“.

**Zastupnik Mumamer Bandić je podnio sljedeće (citiramo):** „Prije svega želim da napomenem Vladu da još nisam dobio odgovor na pitanje zastupničko koje sam postavio na prethodnim sjednicama a koji se odnosi na prijedlog Nezavisnog odbora Skupštine Kantona Sarajevo da se policijski komesar smijeni sa dužnosti policijskog komesara. Molim da mi se taj odgovor dostavi što prije. S obzirom na činjenicu da sam ograničen vremenom i brojem pitanja samo za Javnu ustanovu Dom zdravlja Kantona Sarajevo imao bih postaviti na desetine pitanja. Ovom prilikom ću postaviti pitanje a vezano za Pravilnik o radu, unutrašnjoj organizaciji i sistematizaciji radnih mjesta u Javnoj ustanovi Dom zdravlja Kantona Sarajevo koji je usvojen krajem 2022 godine i Ugovor o pružanju usluga u porodičnoj medicini koji su potpisali direktori Zavoda za zdravstveno osiguranje i Javne ustanove Dom zdravlja Kantona Sarajevo 14. 10. 2022. godine. Naime Ugovor o pružanju usluga u porodičnoj medicini koji su potpisali generalni direktor Zavoda za zdravstveno osiguranje i direktor Javne ustanove Dom zdravlja Kantona Sarajevo, između ostalog stoji, da se usluga na nivou Kantona Sarajevo pruža za 191 tim porodične medicine, dok oko 15 timova porodične medicine ili cca 30 000 osiguranika nije obuhvaćeno ovim Ugovorom. Ovo je bitno zato što Dom zdravlja Kantona Sarajevo od Zavoda za zdravstveno osiguranje može naplatiti samo usluge za one osiguranike koji su registrovani u timovima porodične medicine, a koji su prijavljeni u Zavoda za zdravstveno osiguranje na ime doktora medicine. Na ovaj način Dom zdravlja Kantona Sarajevo iako pruža usluge tim osiguranicima taj novac ne može naplatiti. Pretpostavlja se da će Dom zdravlja na ovaj način izgubiti cca 1,5 do 2 miliona konvertibilnih maraka na godišnjem nivou. Dalje, u Ugovoru koji je potpisan između 2 ustanove, Dom zdravlja Kantona Sarajevo se obavezuje da će narednih 12 mjeseci obezbijediti PAD odnosno dodatnu edukaciju iz područja medicine koja je neophodna doktorima da bi mogli voditi timove porodične medicine. Do sada ta edukacija nije počela a sama edukacija traje godinu

dana. Ono što je bitno naglasiti jeste da Dom zdravlja Kantona Sarajevo ima oko cca sto ljekari koji vode timove porodične medicini a koji nemaju edukaciju iz PAD-a. Pravilnikom o radu unutrašnjoj organizaciji i sistematizaciji radnih mjesta koje je predložio Dom zdravlja a usvojilo Ministarstvo zdravstvom krajem prošle godine stoji da ukoliko doktor medicine nema certifikat o dodatnoj edukaciji iz porodične medicine odnosno PAD isti je dužan položiti u roku 12 mjeseci od početka rada u ustanovi. A do tada rad obavlja isključivo pod mentorstvom dok u Ugovoru između Doma zdravlja i Zavoda za zdravstvo osiguranje stoji da Dom zdravlja je dužan obezbijediti edukaciju tim doktorima. Sada se postavljaju dodatna pitanja. Ukoliko Dom zdravlja Kantona Sarajevo sa Zavodom potpisao ugovor u kojem stoji da je Dom zdravlja dužan obezbijediti edukaciju iz porodične medicine zašto Dom zdravlja istu nije obezbijedio? Zašto je Pravilnikom uređeno da je uposlenik dužan položiti tu edukaciju? Ističem da Pravilnikom iz 2018. godine edukacija iz porodične medicine nije bila uređena na način da je uposlenik dužan položiti edukaciju jer tu edukaciju u Kantonu Sarajevo može obezbijediti samo Dom zdravlja Kantona Sarajevo. Dalje se navodi da će uposlenik dok ne položi tu edukaciju svoj rad obavljati pod mentorstvom. Imam sada situaciju da od ukupnog broja cca od 190 do 200 ljekara u porodičnoj medicini samo sto ljekara može raditi samostalno dok drugi cca 90 do 100 mora imati mentora jer nemaju PAD i nisu specijalisti porodične medicine, što znači da imamo oko 100 timova porodične medicine koji nemaju pripadajućeg doktora. Okolnost da ovo pitanje se ne odnosi direktno na ministra, ali ostavljam ministru na dispoziciju da provjeri ova pitanja koja sam ja naveo i da nakon toga sačini jedan pismeni odgovor“.

**Zastupnik Samir Avdić je podnio sljedeće (citiramo):** „Ovaj drago mi je što je kolegica Pekić, pa i kolega Marjanović, da su pokrenuli ovu inicijative koje su u vezi sa djelovanjem civilnih zaštita i posebno mi je drago što je kolegica Pekić se sjetila da u strukturama civilne zaštite sudjeluju i dobrovoljna vatrogasna društva, odredi izvođača i Crveni križ, Caritas odnosno Merhamet, te Gorska služba spašavanja. Vrlo je važno ovaj vrlo je važno prepoznati i potencijal koji postoji u takvim udruženjima. Ono što bih ih je dodao na ove dvije inicijative a evo sad je aktuelno sigurno najviše cijenimo ovaj značaj Civilne zaštite kada nam je kada su aktuelne i ovaj prirodne nepogode, a to je da bez obzira što novca postoji, naravno možda nikad nije dovoljno koliko bi trebalo, ali novca postoji u svim opštinskim civilnim zaštitama, kao i u Kantonalnoj upravi civilne zaštite, međutim vrlo je teško realizovati budžete i to znaju ljudi koji se bave javnim nabavkama u civilnim zaštitama, a razlog zbog čega je to jako teško jeste što najprije federalni nivo vlasti nije promijenio određene pravilnike pa već dugo nije radio ni na Zakonu o zaštiti i spašavanje ljudi i materijalnih dobara od prirodnih i drugih nesreća. Još je lošija situacija sa pravilnikom koji uređuje na koji način i koja materijalno tehnička sredstva se mogu nabavljati tako da mi sada u 2023. godini, a to znam iz iskustva budući da sam kao izvođač dio strukture civilne zaštite Opštine Ilidža, ne možemo nabaviti opremu najmoderniju, savremenu koja je potrebna u ovom vremenu, već se još uvijek ta sredstva nabavljaju na osnovu JUS-a odnosno pravilnika koji su iz 80-tih godina, odnosno iz vremena bivše Jugoslavije. Pa tako na primjer da bi ovaj javnost bolje shvatila, ukoliko bismo htjeli da nabavimo Gajgerov brojač prema JUS-u i prema pravilniku koji je važeći morali smo nabaviti onaj koji je veličine otprilike kao ova skupštinska govornica, iako postoji na tržištu Gajgerovi brojači koji su veličine mobitela. Ne možemo kroz civilnu zaštitu nabaviti na primjer dron koji bi pomogao prilikom spašavanja odnosno traženja ljudi na nepristupačnim područjima već ustvari možemo nabaviti onu masku JU 79/12 itd. Vrlo je važno promijeniti te pravilnike i olakšati civilnim zaštitama i Kantonalnoj upravi civilne zaštite nabavku potrebne opreme“.

**Zastupnik Adi Kalem je podnio sljedeće (citiramo):** „Ja sam danas pripremio dvije inicijative koje ću i pročitati. Svakako sam dostavio pismenim putem na onu mail adresu. Pokrećem inicijativu za unapređenje saobraćaja u mirovanju na području Kantona Sarajevo uz obrazloženje: određena istraživanja su pokazala da građani grada Sarajeva i Kantona Sarajevo gube dosta vremena

prilikom pronalaska parking mjesta. Problem predstavlja svakim danom sve veći povećan broj vozila na ulicama, tako i nedostatnost broja parking mjesta. Izgradnjom novih parking mjesta na području postojećih željezničkih stanica na području Kantona Sarajevo može se djelimično riješiti ovaj problem. Naime tripartitnim djelovanjem Vlade Kantona Sarajevo, Javnog preduzeća Željeznica Federacije BiH Sarajevo i lokalnih zajednica uveliko se može popraviti stanje dovoljnog broja parking mjesta u Kantonu Sarajevo. Obzirom da su Vlada Kantona Sarajevo, Željeznice Federacije BiH uz podršku i inicijative pojedinih načelnika općina na području Kantona Sarajevo uvele voz koji je predmet sporazuma, te da postoje prostorni kapaciteti oko staničnih područja, te da većina putnika ovog vida prijevoza su udaljeni staničnog područja isti dolaze privatnim automobilima do javnog prevoza željeznicom, predlažem Vladi sljedeći zaključak: "Zadužio se Vlada Kantona Sarajevo, resorno Ministarstvo da u roku 30 dana održi neophodne sastanke sa predstavnicima Željeznica i lokalnih zajednica, prikupe sve neophodne informacije o postojećim kapacitetima povećanja broja parking mjesta, te modelu finansiranja izgradnje istih, te da Vlada i resorno Ministarstvo obavijeste Skupštinu Kantona Sarajevo o provedenim aktivnostima. Također pokrećem još jednu inicijativa a tiče se Ministarstva privrede Kantona Sarajevo. Pokrećem inicijativu za izradu poslovnog biltena odnosno vodiča poslovnih subjekata sa područja Kantona Sarajevo uz obrazloženje: i pored rada reprezentativnih udruženja poslodavaca na nivoima Kantona i Federacije neophodno je učiniti sve napore za boljom i efikasnijom prezentacijom različitih vrste poslova i usluga privrednih i uslužnih subjekata, poboljšanja imidža privrednika koji gravitiraju na području Kantona Sarajevo radi institucionalne pomoći privrednim subjektima kroz određeni vid marketinga. Naime, općepoznata je činjenica da institucije, resori Vlade Kantona Sarajevo imaju mnogo dodirnih tačaka sa stranim investitorima i stranim institucijama kroz određene vidove međunarodne suradnje, te u svrhu lakšeg pronalaska domaćih partnera na području Kantona Sarajevo neophodno je napraviti reprezentativni godišnji vodič ili bilten poslovnih subjekata razvrstanih po djelatnostima kojima se bave. Smatram da bi puno pomogli sa jedne strane investitorima i izvođačima radova da se lakše adaptiraju na naše tržište a sa druge strane uveliko bi pomogao domaćim privrednicima u prezentaciji njihovih djelatnosti i pronalaska angažmana. Ja se izvinjavam, uglavnom tražit ću izjašnjenje za ovu inicijativu uz zaključak koji je dat u samoj inicijativi“.

**Zastupnica Mimirka Melank je podnijela sljedeće (citiramo):** „U Sarajevu postoji oko 120 nacionalnih spomenika koji su po kategorizaciji najznačajnija kulturno-istorijska dobra a koje je na listu stavila Komisija za očuvanje nacionalnih spomenika Bosne i Hercegovine. Sve intervencije na njima su nadležnost Federalnog zavoda u sklopu federalnog Ministarstva kulture i sporta. Svi ostali objekti od kulturno istorijskog značaja su u nadležnosti Kantonalnog zavoda. To je plava zona historijskog urbanog krajolika Sarajeva. Komisija je veliki dio grada kao ambijentalne cjeline proglasila nacionalnim spomenikom i podjela na 2 zone: crvenu koja pripada Federaciji i plavu o kojoj račun vodi Kanton. U separatima zaštite koji je uradio Kantonalni zavod za zaštitu kulturno historijskog i prirodnog nasljeđa Kantona Sarajevo štite se i pojedinačni objekti. U slučajevima kada u njihovom okruženju nema posebnih vrijednosti iz oblasti baštine. Zavod radi prijedlog prethodne zaštite spomenika, taj prijedlog usvaja Skupština Kantona. Prijedlozi prethodne zaštite nisu rađeni zadnjih petnaestak godina, a 6 je prijedloga pravne zaštite urađeno prošle godine. Svaki prijedlog je zapravo elaborat. Zavod nema listu prioriteta i može je uraditi ali prvo se mora osvojiti kategorizacija. Uslovno rečeno to su manje značajni objekti jer je Odlukom Komisije za očuvanje nacionalnih spomenika oduzeta nadležnost Zavodu i prebačena na Federaciju. Uredbom Vlade Federacije našem Zavodu je oduzeta i licenca za rad na nacionalnim spomenicima. To je potpuni paradoks da Zavod koji postoji 60 godina i koji je osnovan da bi sačuva baštinu Sarajeva sada više nema zakonsko pravo da to radi. Zakon kaže da je obaveza vlasnika kulturno istorijskog dobra tekuće održavanje. Da bi finansirali obnovu nekog dobra treba usvojiti kategorizaciju odnosno kriterij na osnovu koga biramo baš taj objekat za rekonstrukciju a ostalih stotine ostavljamo na čekanju, kako se to radi u svim drugim evropskim zemljama. Stoga pokrećem inicijativu za izradu kategorizacije prema sopstvenom Pravilniku Zavoda za zaštitu ili prema Pravilniku o kriterijima vrednovanja podijeli kategorizacije

nacionalnih spomenika Komisije za očuvanje nacionalnih spomenika Bosne i Hercegovine koji ću dostaviti pismeno“.

**Zastupnik Marijela Hašimbegović je podnijela sljedeće (citiramo):** „Za ovu sjednicu pripremila sam dva zastupnička pitanja i tri inicijative. Samo ću obrazložiti ove inicijative koje sam već uputila u elektronskoj formi radi ograničenog vremena. Ući ću samo u meritum dakle inicijativa, one se tiču i podnosi ih naravno Vladi Kantona Sarajevo a tiču se izrade Zakona o lokalnoj samoupravi Kantona Sarajevo. Smatram da je zakon neophodan s tim u vezi jer na terenu imamo preklapanje nadležnosti više nivoa vlasti. Sljedeći zakon je Zakon o registru osoba sa invaliditetom obzirom da registar osoba sa invaliditetom na nivou Kantona Sarajevo nemamo. Treća inicijativa je upućena Ministarstvu za odgoj i obrazovanje i tiče se digitalizacije procesa prijema radnika u predškolske institucije i osnovne škole Kantona Sarajevo. Smatram da su procesi prijema radnika odveć jako komplicirani, što za komisije, a isto tako i aplikante i mislim da bi ovaj način uveliko relaksirao ove procese, učinio ih transparentnijim, smanjili bi troškove i na neki način spriječili bi bilo kakve nevoljne radnje prilikom prijema radnika u ove institucije“.

**Zastupnik Haris Zahiragić je podnio sljedeće (citiramo):** „Imao bih nekoliko pitanja- prvo je vezano za javni gradski prijevoz- konkretan slučaj linija Otoka- Boljakovo, a nije jedina linija koja ima takav problem. Centrotrans je dobio tu liniju i nije jedina javna linija koju je on dobio, međutim nakon što dobiju liniju počnu praviti pauzu od dva, tri sata, ljudi ne mogu da ostvare elementarno pravo na javni gradski prijevoz. I Ono što najgore Centrotrans ne priznaje kupone radničke, pa zanima me pitanje za ministra Štetu, ministra saobraćaja, na koji način kako je zakonito to što Centrotrans to radi. Koristim ovu priliku da apelujem na Centrotrans da ako je već uzeo posao javnog prijevoza da se ponaša kao javni operater a ne privatni, koji mu je isključivo kapital i profit u interesu jer ako žele da rade i da vrše javnu nadležnost onda se moraju drugačije ponašati. Pitanje za ministra Delića koliko će koštati Šumarijada koja je najavljena na Igmanu? Koliko sredstava će Kanton platiti za organizaciju i ko je organizator? Četvrto pitanje a možete shvati kao inicijativu. Na prošloj sjednici Skupštine Kantona Sarajevo ova Skupština jednoglasno usvojila moju inicijativu da se školarine za studente koji su ispunili uslove vrata i da se status redovnih studenata počne primjenjivati zato što je Zakon o visoko obrazovanje prošli koji smo donijeli to zapravo propisao. Nažalost situacija je takva da konkretno najgori slučaj, slučaj Stomatologije na kojem studenti ,osim što nisu prebačeni na redovne studente, a morali su jer su ispunili zakonske uslove, školarine su platili, bili su prinuđeni da plate školarine, a sada im ne žele refundirati, čak traže drugu ratu da se vrati. Ja se sjećam kada je usvojen zakon, kolega Marjanović koji je podržao tu vrstu inicijative je pitao da li postoje finacijska sredstva za to. Nažalost tada je ministar činim mi se Čičić premijer Forto i ministrica obrazovanja svi su rekli da to neće iziskivati dodatne finacijske troškove. Danas manje od godinu dana nakon tog zakona imamo situaciju da imamo normu koju niko ne provodi. To je nipodaštavanje Vladavine prava, to je pravna nesigurnost i za roditelje i za studente te insistiram da ministrica visokog obrazovanja odgovori kako sa do sada to implementiralo, zašto dopušta da Stomatologija, pa i Univerzitet koordinirano dezavuišu javnost i zašto se studentima ne vrati njihov novac, a one koji su ispunili uslove za prelazak na redovne, zašto ih ne prebacite? Ja znam da je prošla kampanja i da ste to radili iz tih razloga, ali to košta gospodo, snosite odgovornost, snosite troškove. I treće pitanje , četvrto za ministra Vranića. Mi smo bili usvojili inicijativu i zaključak da se mladi, da se obezbijedi program kojim će mladi ljekari svi u Kantonu Sarajevo a koji su na Birou dobiti priliku za prvo radno iskustvo. Prošlo je više od pola godine, takvog programa nažalost koordinacije Vlade i Ministarstva i Zavoda za zapošljavanje nema, pa me zanima da li je ministre išta tim povodom urađeno i kada možemo očekivati program? Mislim da to mora biti stalni problem koji se treba jednom za sva vremena donijeti a kako naši ljekari bi moglo dobiti priliku za prvo radno iskustvo a ne da odlaze po njega u države Zapadne Evrope.“

**Zastupnica Admela Hodžić je podnio sljedeće (citiramo):** „Podnosim inicijativu prema Vladi Kantona Sarajevo da se u što kraćem vremenskom periodu uputi zahtjev svim nadležnim istražnim organima za provođenje istrage u Kantonalnom javnom preduzeću Sarajevo-šume doo Sarajevo zbog sumnje u činjenje nezakonitih radnji koje su iz Ureda za reviziju institucija Federacije Bosne i Hercegovine svojim izvješćem o finansijskoj reviziji utvrdili kao osnovu za negativno mišljenje a naveli su sljedeće nepravilnosti: pod 1. Poslovni biološke reprodukcije šuma nisu izvršeni u minimalnom obimu koji je predviđen šumsko gospodarskim osnovama sukladno Zakonu o šumama Kantona Sarajevo i Ugovoru o prijenosu poslova gospodarenja državnim šumama na području Kantona Sarajevo u 21. godini. Šumsko uzgojni radovi izvršeni su u procentu tek 7 %. Nije postupljeno ni u skladu sa članom 19 Zakona. Pod 2. Trogodišnji plan poslovanja za razdoblje 21.-23. te na osnovu njega nastali plan za 21. godinu donosi se tek u novembru 21. godine i ne mogu postavljati temelje za praćenje izvršenja poslovnih aktivnosti tekuće godine na način propisan članom 24 Zakona o javnim preduzećima Federacije Bosne i Hercegovine. Usvojeni plan poslovanja nije dostavljen Uredu za reviziju institucija u FBiH sukladno odredbama Zakona o javnim preduzećima u FBiH. Pod 3. Prodaja šumskih drvnih sortimenata nije vršena transparentno i na tržišni način sukladno Odluci o načinu prodaje drvnih sortimenata porijeklom iz državnih šuma na teritoriji FBiH, isporučene su veće količine od ugovorenih putem javnih oglašavanja, a za dodatne isporuke nisu primjenjivane veće cijena shodno javnom oglasu. Društvo nije ponudilo minimalno 20 % klasiranih šumskih drvnih sortimenata naknadnom prodajom jer je putem licitacije ugovoreno 8,64 % od stvarne realizacije. Pod 4. Popisom imovine i obaveza na datum bilanse nije utvrđeno stvarno stanje niti je u poslovnim knjigama izvršeno usklađivanje knjigovodstvenog sa stvarnim stanjem imovine dane drugim pravnim licima na zajam, potraživanja rezerviranja i ostalih pasivnih razgraničenja na način propisan Pravilnikom o popisu imovine i obavezi i Zakonom o računovodstvu i reviziji u Federaciji BiH. Pod 5. Društvo nije postupilo ni sukladno članu 4 Zakona o šumama Kantona Sarajevo kojim je utvrđeno da šume i šumsko zemljište kao dobro od općeg interesa uživaju posebnu brigu i zaštitu Kantona Sarajevo i općina. Zahvaljujem se. Ostalo će dostaviti u pisanoj formi“.

**Zastupnik Irfan Čengić je podnio sljedeće (citiramo):** „Ja imam jedno pitanje i inicijative ali pošto nema ministra komunalne privrede ja ću dakle traži da se pismeno izjasni a mislio sam usmeno. Dakle na prošloj sjednici Općinskog vijeća Stari Grad ponovo je usvojen zaključak da se izmijeni Odluka o zaštiti planinskih izvora vode za piće sarajevskog vodotoka sistema i djelotvornog toka rijeke Mošćanice 1977. godine. Ta odluka se tiče jedno 500 stambenih objekata u mjesnoj zajednici između ostalog u kojoj živim i jako mi je bitno da znam šta se dešavati dalje u ovom procesu. Dakle općina Stari Grad je uradila elaborat koji je dokazao da kvaliteta vode je loša i da se takva voda isključuje kao izvorište pitke vode. To je bilo u prošlom mandatu jednom na dnevnom redu pa je povučeno. Zanima me da ministar kada će dostaviti ponovo Vlada tu odluku na dnevni red Skupštine? Da li su otklonjeni svi nedostaci o kojima je govorio prošli put ministar kada je ta Odluka bila na dnevnom redu ili da li je općina odradila sve što je trebala općina da odradi i šta dalje možemo očekivati po ovom pitanju? Druga stvar jest inicijativa prema Turističkoj zajednici Kantona Sarajevo, da se u ovoj godini realizuje Program promocija brenda Visit Sarajeva kroz sport. Podsjećam da u prošloj godini i pred kraj prethodne godine dakle 10. augusta i 29. Decembra 21. preko 40 projekata udruženja sportskih saveza, klubova i 9 pojedinaca je dobilo preko 500 000 maraka iz Turističke zajednice Kantona Sarajevo za promociju brenda i mislim da to bila kvalitetno uložena sredstva za promociju Visit Sarajeva jer kada smo na europskim prvenstvima i utakmicama naših reprezentacija, naših olimpijaca i širom svijeta gledali slike gdje se vidi brend Visit Sarajevo itekako je donijelo promociji našeg Sarajeva grada i Kantona i mislim da taj projekat treba realizovati i ove godine kao što je to urađeno u prošloj godini kada je direktor bio sada naš kolega Kenan Magoda“.

**Dopredsjedavajući Vibor Handžić je podnio sljedeće (citiramo):** „Imam jednu inicijativu. Dakle ulica Alipašina 41 dakle tačnije onaj pješački prijelaz semafori iz ulice Sutjeska pa koji ide na ulicu preko puta dakle, dakle to zeleno svjetlo za pješake zaista prekratko traje. I tom relacijom dakle saobraćaju vozila ogromnom brzinom i jako su česte saobraćajne nesreće na tom periodu. S obzirom da se u 100 m oko tog pješačkog prijelaza nalazi jedna međunarodna škola, da se nalazi vrtić, da je tu sa desne strane Druga gimnazija podnosim inicijativu prema Ministarstvu saobraćaja i Direkciji za puteve Kantona Sarajevo za postavljanje saobraćajnih znakova na tom pješačkom prijelazu "djeca na putu" i "škola u blizini", te da evo Ministarstvo ili Direkcija iznađu način za regulisanje brze vožnje automobila dakle na tom prostoru, da li postavljanjem kamera, da li reguliranjem, odnosa smanjenjem maksimalne dozvoljene brzine na tom području. Inicijativa koju sam podnio na prvoj sjednici vezana za postavljanje stacionarnog radara i radara, pardon opet ista greška, i svjetlosne signalizacije u blizini osnovne škole Stari Ilijaš dobivam dakle bizarne odgovore. Dakle na inicijativu koju su prema Ministarstvu saobraćaja istu podnijeli Savjet mjesne zajednice Stari Ilijaš i zastupnica Bibija Kerla u odgovoru Ministarstva se kaže da je za to nadležna Direkcija za ceste Kantona Sarajevo. Ja sam inicijativu prosljedio u skladu s tim odgovorom na Direkciju za ceste. Direkcija za ceste mi je odgovara da je za to nadležno Ministarstvo saobraćaja i citira. Član 6 Pravilnika o unutrašnjoj organizaciji Ministarstva saobraćaja Kantona Sarajevo. Ovaj bezveze dakle gubimo vrijeme, ja ću inicijativu ponovno podnijeti na Direkciju za ceste i na Ministarstvo saobraćaja i na Ministarstvo unutrašnjih poslova i ja vas molim da se usaglasite oko toga ko je nadležan i da konačno dobijem neki odgovor u pravcu dakle realizacija ove inicijative zato što je zaista po đake te škole ovo nesigurno područje zbog velike brzine kojom se odvija saobraćaj na tom području“.

**Zastupnik Elvis Vreto je podnio sljedeće (citiramo):** „Ja sam jednu inicijativu pred kraj mandata prošlog uputio, međutim vjerovatno zbog proceduralnih razloga isteka mandata ona nije došla do samog Ministarstva pa želim samo onaj ponovim. Znači upućujem je prema Vladi odnosno Ministarstvu komunalne privrede, infrastrukture, prostornog uređenja, građenja i zaštite okoliša da se planiraju sredstva i uvedu nova dva programa poticaja sufinansiranja kod ugradnje solarnih panela za proizvodnju električne energije, sistema toplotnih pumpi i slično kako za individualna domaćinstva tako i za poslovne subjekte u Kantonu Sarajevo. Također tražim od Vlade da razmotri ovaj program poticaja i kako za 23. godinu budžetsku tako i za naredne godine kao stalni program u kojim bi se zainteresovanim građanima i individualnim domaćinstvima i poslovnim subjektima putem sufinansiranja ugradnje pomoglo u što masovnijem korištenju ekološki prihvatljivih izvora energije. Svjedoci smo globalnog stanja i poremećaja sa cijenama energenata, smatram da je neophodno brzo djelovati i uvođenjem ove vrste poticaja. Posebno naglašavam da bi ova mjera dugoročno dala rezultate i oko poboljšanja kvalitete zraka u Kantonu Sarajevo. S obzirom na ozbiljne probleme po ovom pitanju i opredjeljenje Skupštine i Vlade Kantona Sarajevo za što brža a prihvatljiva rješenja po ovom osnovu. Tražim od Vlade Kantona Sarajevo odnosno resornog Ministarstva da razmotri i usvoji inicijativu uz prijedlog da se definiše procenat sufinansiranja i također tražim od vlade da se sa institucijama na nivou Federacije Bosne i Hercegovine, Elektroprivreda BiH i Fond za zaštitu okoliša, kao i lokalnim zajednicama uspostavi model saradnje sa dodatnim učešćem podrške shodno programima i finansijskim mogućnostima. Posebno naglašavam neophodnu saradnju sa EU fondovima institucijama koje pružaju podršku proizvodnji obnovljivih ekoloških prihvatljivim vidovi energije. S obzirom na dosadašnje opredjeljenje Vlade Kantona Sarajevo vjerujem da će ova inicijativa dobiti podršku i za nju tražim pisano izjašnjenje“.

**Predsjedavajući Elvedin Okerić je podnio sljedeće (citiramo):** „Iskoristit ću svoje pravo da podnesem jednu zastupničku inicijativu. Inicijativu prema Vladi Kantona Sarajevo i nadležno Ministarstvu koja glasi: uzimajući u obzir činjenicu da je Bosna i Hercegovina od 6.9.2022 godine postala punopravan član mehanizma Europske unije za civilnu zaštitu stoga upućujem inicijativu prema Vladi Kantona Sarajevo i nadležnom Ministarstvu da stavi u prioritete u svoje

prioritete donošenje Zakona o gorskim službama spašavanja kojim bi se uredio sistem funkcionisanja gorske službe spašavanja na nivou Kantona Sarajevo. Kako su gorske službe spašavanja udruženja građana na ovakav način bi se uredila oblast angažovanja iste u planinama na nepristupačnim područjima i drugim vanrednim okolnostima. Način gorske službe spašavanja, saradnja sa ostalim organima, kao i angažman svakog pojedinca člana gorske službe spašavanja koji je u radom odnosno učestvuje u intervenciji za vrijeme radnog vremena i slično. Vlada Kantona Sarajevo Uredbom o organizovanju službi zaštite i spašavanja jedinica specijalizovane namjene Kantona Sarajevo, a zbog svog značaja povezanošću sa djelatnošću civilne zaštite, Gorsku službu spašavanja stanica Sarajevo i Gorsku službu spašavanja Kantona Sarajevo proglasila službom zaštite i spašavanja na području Kantona Sarajevo koje su tehnički i materijalno opremljene za spašavanje iz lavina, potrage i spašavanja na vodi i pod vodom. Obje gorske službe spašavanja imaju veliku ulogu kada pri spašavanju treba primijeniti posebno stručno znanje i upotrijebiti odgovarajuću opremu za spašavanje na pogođenom području. Prema materijalnoj formaciji obje gorske službe spašavanja broje oko 86 pripadnika koji su sistematizovani kroz ličnu formaciju. Posebne rezultate su pokazali pri pronalasku izgubljenih planinara i turista te na obezbjeđivanju skijališta. Njihova uloga je nezaobilazna u sistemu zaštite i spašavanja, ima humanitarni karakter i pripadnici obje gorske službe spašavanja učestvuju u svim akcijama zaštite i spašavanja prilikom proglašenja stanja prirodne i druge nesreće“.

Nakon iscrpljene liste prijavljenih za pitanja i inicijative predsjedavajući je predložio, uz konsultacije sa kolegama iz ostalih stranaka, da zbog važnosti sljedećih tačaka ovaj put ministri ne odgovaraju na pitanja na koja je tražen usmeni odgovor, već da svoje odgovore dostave u pisanoj formi.

Slijedom ovog prijedloga zastupnik Haris Zahiragić je predložio da se onda pitanja koja su postavljena, a na koja je tražen usmeni odgovor, dostave od strane Službe za skupštinske poslove nadležnim ministrima, kako zastupnici ne bi imali obavezu da ista pretvaraju u formalna pitanja, s čim se predsjedavajući složio.

Obzirom da nije bilo više prijavljenih diskutanata, predsjedavajući je dao kratku pauzu i zamolio šefove klubova da se sastanu kako bi se dogovorili vezano za glasanje po inicijativama koje su podnijeli zastupnici a o kojima se traži izjašnjenje na sjednici.

#### NASTAVAK NAKON PAUZE

U nastavku sjednice nakon konsultacija, predsjedavajući je upoznao zastupnike da će inicijativa dopredsjedavajuće Danijele Kristić prvo biti upućena prema Vladi na izjašnjenje, pa ukoliko bude potrebe, Skupština se o istoj može izjasniti na sljedećoj sjednici.

Ministrica pravde i uprave, Darja Softić-Kadenić, je imala intervenciju na ovu inicijativu u smislu da jedino Skupština može utvrditi javni interes, a Vlada može biti samo predlagач ovakve odluke prema Skupštini, te s tim u vezi je zamolila da se ista preformuliše.

Zatim je zaključeno da se ne izjašnjava o inicijativi zastupnika Irfana Čengića jer je dobio odgovore od Vlade KS.

Predsjedavajući je pozvao zastupnike da se izjasne o inicijativama zastupnika Adija Kalem, kako slijede:

*„Pokrećem inicijativu za izradu poslovnog biltena- vodič poslovnih subjekata na području Kantona Sarajevo“.*

Ista je usvojena većinom glasova (26 „ZA“, 1 „protiv“ i niko „suzdržan“).



*"Pokrećem inicijativu za unapređenje saobraćaja u mirovanju na području Kantona Sarajevo".*

Ista je usvojena jednoglasno (29 „ZA“).

*Predsjedavajući je naglasio da će se u obje inicijative zamijeniti rok za izvršenje u odnosu na prijedlog, te treba da piše „u što kraćem roku“.*

Prešlo se na realizaciju druge tačke dnevnog reda.

**AD-2.**

## **PRIJEDLOG ODLUKE O RAZRJEŠENJU PREMIJERA KANTONA SARAJEVO**

Zastupnici su materijal za ovu tačku dobili u dopunskom materijalu.

Uvodničar je bio predsjedavajući Skupštine koji je ujedno i predsjedavajući Komisije za izbor, imenovanja i administrativna pitanja.

Istakao je da je na lični zahtjev premijera Edine Forte o razrješenju s dužnosti premijera, Komisija za izbor, imenovanja i administrativna pitanja utvrdila Prijedlog odluke koji glasi: "Da se Edin Forto razrješava dužnosti premijera Kantona Sarajevo zaključno sa 25.01.2023. godine na lični zahtjev zbog imenovanja na poziciju ministra komunikacija i promet u Vijeću ministara Bosne i Hercegovine".

Nije bilo prijavljenih za pitanja, a u diskusiji su učestvovali zastupnici: Haris Zahiragić, Elvedin Okerić, Damir Marjanović, Aljoša Čampara, Marijela Hašimbegović, Mahir Dević, Vildana Bešlija i Muamer Bandić.

*Predsjedavajući je pozvao zastupnike da pristupe izjašnjavanju o Prijedlogu odluke o razrješenju premijera Kantona Sarajevo.*

*Skupština nije (14 „ZA“, 6 „protiv“ i 8 „suzdržanih“) donijela ovu Odluku.*

*Zastupnica Vildana Bešlija, u svojstvu šefa Kluba Naše strane, izrazila je u sumnju u glasanje i zatražila pojedinačno glasanje. Također je tražena pauza od deset minuta.*

### **NASTAVAK NAKON PAUZE**

U nastavku nakon pauze predsjedavajući je zamolio sekretarku Skupštine da izvrši prozivanje zastupnika za pojedinačno glasanje.

*Zastupnik Mahir Dević je poslovničkom intervencijom tražio sljedeće (citiramo): „Samo da se konstatuje sekretaru Skupštine radi zapisnika i stenograma. Znači zastupnici koji su bili u trenutku glasanja, pošto vidim u međuvremenu da ste doveli četiri zastupnika koji nisu bili na javnom glasanju, da se kaže ko su ti zastupnici novi koji sada dolaze da glasaju nakon što je zaključena rasprava i tako dalje. Poslovnik pitanje pojedinačnog izjašnjavanja vrlo jasno i precizno definicije da je ono potrebno da bude urađeno samo onda kada je bilo nemoguće utvrditi rezultate prethodnog glasanja, iz nekog razloga. Ovo sve drugo je zloupotreba i ono je nama vrlo važno zbog procedura koje ćemo dalje pokrenuti. Znači ko su ti novi zastupnici koji treba sada da pristupe glasanju, a koji nisu bili jutros, jer je to zloupotreba Poslovnika. Ovo radi stenograma govorim, naravno“.*

Zastupnica Vildana Bešlija je pojasnila da je tražila pojedinačno izjašnjavanje zastupnika zato što dva zastupnika koja sjede u sali nisu mogla glasati putem tastera, te njihov glas nije zabilježen.

Potom je sekretarka Skupštine Aida Zeković prozvala zastupnike da pojedinačno glasaju.

Predsjedavajući je konstatovao da je nakon pojedinačnog izjašnjavanja Skupština Kantona Sarajevo većinom glasova (18 „ZA“, 4 „protiv“, 8 „suzdržanih“) donijela Odluku o razrješenju premijera Kantona Sarajevo.

*Također je zamolio sekretarku Skupštine da protumači proceduru koja je provedena po pitanju donošenja ove Odluke.*

*Sekretarka Aida Zeković je navela sljedeće (citiramo):* „Kada je u pitanju Prijedlog odluke o razrješenju premijera Kantona Sarajevo isti je Komisija za izbor i imenovanja i administrativna pitanja Skupštine Kantona Sarajevo donijela na sjednici održanoj dana 27. 1. 2023. godine. Komisija je znači na svojoj sjednici razmatrala zahtjev koji je podnio premijer Edin Forto i u tom slučaju se vodila znači odredbama člana 8 Zakona o Vladi Kantona Sarajevo a koji definiše, citirati ću stav 3 člana 8 koji glasi: "U slučaju da mjesto premijera ostane upražnjeno kandidata za premijera se imenuje u roku 30 dana od dana kada je mjesto premijera ostalo upražnjeno na način utvrđen Ustavom do kada funkciju premijera obavlja član Vlade Kantona kojeg odredi predsjedavajući Skupštine Kantona u konsultaciji sa zamjenicima predsjedavajućeg Skupštine Kantona. S danom imenovanja kandidata za premijera smatra da su dosadašnji članovi Vlade u ostavci koja stupa na snagu danom potvrđivanje imenovanja Vlade u novom sazivu. Do potvrđivanja imenovanja Vlade u novom sazivu dosadašnji članovi Vlade nastavljaju s obavljanjem funkcije članova Vlade i ministara ministarstava. Potvrđivanje Vlade u novom sazivu obaviti će se u roku 30 dana od dana imenovanja kandidata za premijera". Shodno tome cjelokupna procedura je prošla nadležnu Komisiju i dostavljena je Skupštini sa kompletnom dokumentacijom na razmatranje i odlučivanje“.

Predsjedavajući se zahvalio sekretarki Skupštine i prešlo se na realizacija tačke tri.

### **AD-3.**

#### **NACRT BUDŽETA KANTONA SARAJEVO ZA 2023. GODINU**

Zastupnici su materijal dobili uz poziv za sjednicu. Uvodnu riječ je podnio ministar finansija, Davor Čičić.

Ispred Komisije za kulturu i sport obratio se zastupnik Irfan Čengić, ispred Komisije za mlade zastupnik Rusmir Pobrić, ispred Komisije za obrazovanje i nauku se obratio zastupnik Damir Marjanović, te zastupnica Sanela Klarić ispred Komisije za poljoprivredu, šumarstvo, privredu i prehrambenu industriju Skupštine Kantona Sarajevo.

Predsjedavajući je otvorio mogućnost postavljanja pitanja koju su iskoristili zastupnici: Elvis Vreto, Mahir Dević, Danijela Kristić, Marijela Hašimbegović, Vedrana Vujović, Damir Marjanović, Admela Hodžić, Samir Avdić, Fatima Gavrankapetanović-Smailbegović, Smiljana Viteškić, Elza Gaković, Jelena Pekić i Kenan Magoda.

Obzirom da se iscrpila lista prijavljenih za postavljanje pitanja dopredsjedavajući Vibor Handžić je predložio da se napravi pauza do 16,00 sati kako bi ministri mogli da pripreme

odgovore na pitanja i obave sastanak u Ambasadi Republike Turske po pitanju pomoći Kantona Sarajevo unesrećenim građanima u zemljotresu.

Zastupnici su većinom glasova (18 „ZA“, niko protiv i 2 „suzdržana“) izglasali pauzu do 16,00 sati.

#### NASTAVAK NAKON PAUZE

U nastavku sjednice, predsjedavajući Elvedin Okerić je zamolio ministrice i ministre da ponude odgovore na postavljena im pitanja.

Odgovore su dali ministrice i ministri: ministar za boračka pitanja Omer Osmanović, ministrica za odgoj i obrazovanje Naida Hota-Muminović, ministrica za rad, socijalnu politiku, izbjeglice i raseljena lica Ivana Prvulović, ministar privrede Adnan Delić, ministar unutrašnjih poslova Admir Katica, ministrica pravde i uprave/ v.d. premijera Darja Softić-Kadenić, ministar saobraćaja Adnan Šeta, ministar kulture i sporta Samir Avdić, pomoćnik ministrice visokog obrazovanja, nauke i mladih Nihad Šeta, ministar zdravstva Haris Vranić, ministar komunalne privrede, infrastrukture, prostornog uređenja, građenja i zaštite okoliša Enver Hadžiahmetović, i ministar finansija Davor Čičić.

U otvorenoj diskusiji su učestvovali zastupnici: Mahir Dević, Mimirka Melank, Irfan Čengić, Nihad Uk, Haris Zahiragić, Faruk Kapidžić, Marijela Hašimbegović, Vedrana Vujović, Kenan Magoda, Sanela Klarić, Samir Avdić, Muamer Bandić, Davor Čičić, Jelena Pekić, Vibor Handžić, Vildana Bešlija, Rusmir Pobrić, Faruk Selmanović, Smiljana Viteškić i Elvis Vreto.

*Po zaključivanju diskusija, predsjedavajući je pozvao zastupnice i zastupnike da se izjasne o inicijativi klubova stranaka u Skupštini Kantona Sarajevo koji su podnijeli inicijativu prema Vladi Kantona Sarajevo da planira finansijska sredstva u Prijedlogu budžeta Kantona Sarajevo za 2023. godinu za pomoć narodu Turske i Sirije koji su pogođeni razornim zemljotresima a koji su za posljedicu imali gubitak hiljada ljudskih života.*

Skupština je jednoglasno (25 „ZA“) usvojila navedenu inicijativu.

*Skupština je potom, izjašnjavajući se o Nacrtu budžeta Kantona Sarajevo, većinom glasova (21 „ZA“, protiv niko i 6 „suzdržanih“) donijela sljedeće Zaključke:*

- 1. Utvrđuje se Nacrt budžeta Kantona Sarajevo za 2023. godinu*
- 2. Javna rasprava održat će se u Kantonalnim organima, jedinicama lokalne samouprave, naučnim i stručnim ustanovama i trajat će 20 dana.*
- 3. Primjedbe, prijedlozi, sugestije zastupnika i mišljenja radnih tijela Skupštine dostavljaju se Vladi Kantona Sarajevo koja organizuje i provodi javnu raspravu.*
- 4. Vlada Kantona Sarajevo dužna je da nakon provedene javne rasprave podnese Skupštini Izveštaj o rezultatima javne rasprave koji sadrži primjedbe, prijedloge i mišljenja, kao i da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Prijedloga budžeta Kantona Sarajevo za 2023.godinu*

Realizacija tačke četiri.

#### **AD-4.**

### **NACRT ZAKONA O IZVRŠAVANJU BUDŽETA KANTONA SARAJEVO KAO DIO OVE PRETHODNE TAČKE**

Materijal je zastupnicima dostavljen uz poziv za sjednicu.

Predsjedavajući je pozvao predstavnika Predlagača da podnese uvodne napomene, no zastupnici su smatrali da isto nije potrebno.

Pitanja su postavili zastupnici Mahir Dević i Marijela Hašimbegović, a odgovore je ponudio ministar finansija Davor Čičić.

U diskusiji, koja je potom otvorena, učestvovali su zastupnici Marijela Hašimbegović, Mahir Dević, Irfan Čengiđ, Vibor Handžić i Haris Zahiragić.

Zaključivši diskusiju, predsjedavajući je predložio da Skupština po Nacrtu zakona o izvršavanju Budžeta Kantona Sarajevo za 2023. godinu donese sljedeće Zaključke:

- 1. Utvrđuje se Nacrt zakona o izvršavanju Budžeta Kantona Sarajevo za 2023. godinu;*
- 2. Javna rasprava održat će se u Kantonalnim organima, jedinicama lokalne samouprave, naučnim i stručnim ustanovama i trajat će 20 dana.*
- 3. Primjedbe, prijedlozi, sugestije zastupnika i mišljenja radnih tijela Skupštine dostavljaju se Vladi Kantona Sarajevo koja organizuje i provodi javnu raspravu.*
- 4. Vlada Kantona Sarajevo dužna je da nakon provedene javne rasprave podnese Skupštini Izveštaj o rezultatima javne rasprave koji sadrži primjedbe, prijedloge i mišljenja, kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Prijedloga zakona o izvršavanju Budžeta Kantona Sarajevo za 2023. godinu.*

Konstatovano je da je Skupština većinom glasova ( 21 „ZA“, niko „protiv“ i 6 „suzdržanih“) donijela ove Zaključke.

Predsjedavajući je obavijestio zastupnike da se konsultovao sa šefom Kluba SDA koji je prethodno tražio pauzu, da se ipak uradi još nekoliko tačaka iz poštovanja prema predstavnicima institucija koji čekaju donošenje ovih odluka kako bi realizovali projekte.

Prešlo se na realizaciju tačke pet.

#### **AD-5.**

**PRIJEDLOG ODLUKE O DAVANJU SAGLASNOSTI ZAVODU ZA IZGRADNJU KANTONA SARAJEVO I DIREKCIJI ZA PUTEVE KANTONA SARAJEVO, ZA ZAKLJUČIVANJE UGOVORA O KUPOPRODAJI PRIVREMENOG OBJEKTA RADI RUŠENJA, IZMEĐU KANTONA SARAJEVO, MINISTARSTVO SAOBRAĆAJA - DIREKCIJA ZA PUTEVE KANTONA SARAJEVO I ZAVODA ZA IZGRADNJU KANTONA SARAJEVO SA JEDNE STRANE I TUCAKOVIĆ ILIJAZA SA DRUGE STRANE, U SVRHU IZGRADNJE „IX“ TRANSVERZALE - RONDO U UL. SAFETA ZAJKE, A U SKLADU SA ODLUKOM O USVAJANJU OKVIRA ZA OTKUP IMOVINE I NAKNADE RADI REALIZACIJE PROJEKTA IZGRADNJE GRADSKIH SAOBRAĆAJNICA U KANTONU SARAJEVO BROJ: 01-04-19714/21 („SLUŽBENE NOVINE KANTONA SARAJEVO“, BROJ: 18/21)**

*Darja Softić-Kadenić, v.d. premijerka Kantona Sarajevo, povukla je navedenu tačku dnevnog reda iz tehničkih razloga.*

*Realizacija tačke šest.*

AD-6.

PRIJEDLOG ODLUKE O DAVANJU SAGLASNOSTI ZAVODU ZA IZGRADNJU KANTONA SARAJEVO I DIREKCIJI ZA PUTEVE KANTONA SARAJEVO ZA ZAKLJUČIVANJE UGOVORA O KUPOPRODAJI PRIVREMENOG OBJEKTA RADI RUŠENJA, IZMEĐU KANTON SARAJEVO, MINISTARSTVO SAOBRAĆAJA – DIREKCIJA ZA PUTEVE KANTONA SARAJEVO I ZAVODA ZA IZGRADNJU KANTONA SARAJEVO SA JEDNE STRANE I TUCAKOVIĆ ILJAZA SA DRUGE STRANE, U SVRHU IZGRADNJE „IX“ TRANSVERZALE – RONDO U UL. SAFETA ZAJKE, A U SKLADU SA ODLUKOM O USVAJANJU OKVIRA ZA OTKUP IMOVINE I NAKNADE RADI REALIZACIJE PROJEKTA IZGRADNJE GRADSKIH SAOBRAĆAJNICA U KANTONU SARAJEVO („SLUŽBENE NOVINE KANTONA SARAJEVO“, BROJ: 18/21 i 5/23).

Zastupnici su materijal dobili u dopunskom materijalu, smatrali su da nisu potrebna uvodna obrazlaganja, nije bilo prijavljenih za pitanja ili diskusiju.

*Predsjedavajući je pozvao zastupnike da se izjasne o Prijedlogu odluke, nakon čega je konstatovao da je Skupština jednoglasno (26 „ZA“) donijela ovu Odluku.*

*Realizacija tačke sedam.*

AD-7.

PRIJEDLOG ODLUKE O DAVANJU SAGLASNOSTI ZAVODU ZA IZGRADNJU KANTONA SARAJEVO I DIREKCIJI ZA PUTEVE KANTONA SARAJEVO ZA ZAKLJUČIVANJE UGOVORA O KUPOPRODAJI BESPRAVNO IZGRAĐENIH OBJEKATA RADI RUŠENJA, IZMEĐU KANTON SARAJEVO, MINISTARSTVO SAOBRAĆAJA – DIREKCIJA ZA PUTEVE KANTONA SARAJEVO I ZAVODA ZA IZGRADNJU KANTONA SARAJEVO SA JEDNE STRANE I „BOSNAPLAST“ D.O.O. SARAJEVO SA DRUGE STRANE, U SVRHU IZGRADNJE „IX“ TRANSVERZALE – RONDO U UL. SAFETA ZAJKE, A U SKLADU SA ODLUKOM O USVAJANJU OKVIRA ZA OTKUP IMOVINE I NAKNADE RADI REALIZACIJE PROJEKTA IZGRADNJE GRADSKIH SAOBRAĆAJNICA U KANTONU SARAJEVO („SLUŽBENE NOVINE KANTONA SARAJEVO“, BROJ: 18/21 I 5/23)

Zastupnici su materijal dobili u dopunskom materijalu, smatrali su da nisu potrebna uvodna obrazlaganja, nije bilo prijavljenih za pitanja ili diskusiju.

*Predsjedavajući je pozvao zastupnike da se izjasne o Prijedlogu odluke, nakon čega je konstatovao da je Skupština jednoglasno (26 „ZA“) donijela ovu Odluku.*

*Realizacija tačke osam.*

AD-8.

PRIJEDLOG ODLUKE O DAVANJU SAGLASNOSTI ZA ZAKLJUČENJE UGOVORA O KUPOPRODAJI BESPRAVNO IZGRAĐENOG STAMBENOG OBJEKTA, ŠTALE, SUŠNICE I PLASTENIKA SVE IZGRAĐENO NA K.Č 173, 174/1 I K.Č 174/3, K.O. KOBILJA GLAVA, IZMEĐU DIREKCIJE ZA PUTEVE KANTONA SARAJEVO I ZAVODA ZA IZGRADNJU KANTONA SARAJEVO SA JEDNE STRANE I SIVAC SALIHA SA DRUGE STRANE U SKLADU SA ODLUKOM O USVAJANJU OKVIRA ZA OTKUP IMOVINE I NAKNADE RADI REALIZACIJE PROJEKTA IZGRADNJE GRADSKIH SAOBRAĆAJNICA U KANTONU SARAJEVO („SLUŽBENE NOVINE KANTONA SARAJEVO“, BROJ: 18/21) RADI RUŠENJA U SVRHU IZGRADNJE SAOBRAĆAJNICE I TRANSVERZALE, TUNEL KOBILJA GLAVA

Zastupnici su materijal dobili u dopunskom materijalu, smatrali su da nisu potrebna uvodna obrazlaganja, nije bilo prijavljenih za pitanja ili diskusiju.

*Predsjedavajući je pozvao zastupnike da se izjasne o Prijedlogu odluke, nakon čega je konstatovao da je Skupština jednoglasno (25 „ZA“) donijela ovu Odluku.*

*Realizacija tačke devet.*

AD-9.

PRIJEDLOG ODLUKE O DAVANJU SAGLASNOSTI ZAVODU ZA IZGRADNJU KANTONA SARAJEVO ZA ZAKLJUČIVANJE UGOVORA O KUPOPRODAJI NEKRETNINE OZNAČENE KAO K.Č. BROJ 22 GRADILIŠTE K.O. SP\_SARAJEVO MAHALA LXVIII, ŠTO PO NOVOM PREMJERU ODGOVARA K.Č. BROJ 2386/1 K.O. SARAJEVO V, IZMEĐU ZAVODA ZA IZGRADNJU KANTONA SARAJEVO SA JEDNE STRANE I UNIVERZITETA U SARAJEVU SA DRUGE STRANE

Zastupnici su materijal dobili u dopunskom materijalu, smatrali su da nisu potrebna uvodna obrazlaganja, nije bilo prijavljenih za pitanja ili diskusiju.

*Predsjedavajući je pozvao zastupnike da se izjasne o Prijedlogu odluke, nakon čega je konstatovao da je Skupština jednoglasno (23 „ZA“) donijela ovu Odluku.*

Po zaključenju devete tačke dnevnog reda predsjedavajući je prekinuo rad na sjednici Skupštine, zahvalio se kolegicama i kolegama zastupnicima i najavio da će o nastavku sjednice biti blagovremeno obaviješteni.

Zapisnik izradila:

Lejla Kadrić

**SEKRETAR**

**SKUPŠTINE KANTONA SARAJEVO**

**Aida Zeković**

**PREDSEDAVAJUĆI**

**SKUPŠTINE KANTONA SARAJEVO**

**Elvedin Okerić**

**ZAPISNIK**  
**O RADU NASTAVKA ČETVRTE RADNE SJEDNICE SKUPŠTINE KANTONA SARAJEVO ODRŽANE 27.03.2023.GODINE SA POČETKOM RADA U 10,00 SATI**

Nastavak Četvrte radne sjednice Skupštine Kantona Sarajevo otvorio je predsjedavajući Elvedin Okerić (u daljem tekstu predsjedavajući).

Sjednici je prilikom otvaranja prisustvovalo 24 zastupnice i zastupnika, dok su se u daljnjem toku iste priključili i ostali, kako slijedi:

**SDA - STRANKA DEMOKRATSKE AKCIJE**

1. Dević Mahir
2. Izetbegović Sebija
3. Kalem Adi
4. Selmanović Faruk
5. Viteškić Smiljana
6. Zahiragić Haris

**POLITIČKA ORGANIZACIJA "NAROD I PRAVDA"**

1. Čampara Aljoša
2. Kristić Danijela
3. Mehmedagić Mersiha
4. Memić Arijana
5. Okerić Elvedin
6. Vreto Elvis

**POLITIČKA ORGANIZACIJA GRAĐANA "NAŠA STRANKA"**

1. Bešlija Vildana
2. Handžić Vibor
3. Klarić Sanela
4. Melank Miomirka

**SOCIJALDEMOKRATSKA PARTIJA BOSNE I HERCEGOVINE**

1. Avdić Samir
2. Čengić Irfan
3. Čičić Davor
4. Kapo Belma
5. Pekić Jelena

**STRANKA ZA BOSNU I HERCEGOVINU**

1. Bandić Muamer
2. Gaković Elza
3. Gavrankapetanović-Smailbegović Fatima
4. Šaljić Jasmin

## **DEMOKRATSKA FRONTA**

1. Hašimbegović Marijela
2. Zuhrić Albin

## **POLITIČKA ORGANIZACIJA/INICIJATIVA “ZA NOVE GENERACIJE”**

1. Marjanović Damir

Izostanak sa ove sjednice opravdali su zastupnica Vedrana Vujović, zastupnik Damir Marjanović, zastupnik Rusmir Pobrić i zastupnica Admela Hodžić.

Nakon intoniranja državne himne, predsjedavajući je pozdravio zastupnice i zastupnike u Skupštini Kantona Sarajevo, članove Vlade Kantona Sarajevo, sve prisutne u sali, kao i predstavnike medija koji prate rad sjednice, a potom je podsjetio da se na prethodnom zasjedanju obradilo prvih devet tačaka, te da za ovaj nastavak sjednice preostaju sljedeće tačke dnevnog reda:

10. Prijedlog Odluke o davanju saglasnosti na Finansijski plan Javne ustanove „Služba za zapošljavanje Kantona Sarajevo“ Sarajevo za 2023. godinu sa Odlukom o izvršavanju Finansijskog plana Javne ustanove “Služba za zapošljavanje Kantona Sarajevo“ Sarajevo za 2023. godinu.  
Malo sam tiše kolege.
11. Prijedlog Odluke o postojanju javnog interesa za osnivanje Javne ustanove Osnovna škola “ROSULJE” Vogošća;
12. Prijedlog Odluke o osnivanju privatne srednje škole pod nazivom - Privatna međunarodna gimnazija QSI International School of Sarajevo – QSI Međunarodna kvalitetna škola Sarajevo;
13. Prijedlog Odluke o davanju saglasnosti na prijedlog Ugovora o zakupu poslovnog prostora Poslovne zgrade KJP Centar “Skenderija” d.o.o. Sarajevo koji zaključuju Ministarstvo saobraćaja Kantona Sarajevo i KJP Centar „Skenderija“ d.o.o. Sarajevo.

*Realizacija tačke deset.*

AD-10.

**PRIJEDLOG ODLUKE O DAVANJU SAGLASNOSTI NA FINANSIJSKI PLAN JAVNE USTANOVE „SLUŽBA ZA ZAPOŠLJAVANJE KANTONA SARAJEVO“ SARAJEVO ZA 2023. GODINU SA ODLUKOM O IZVRŠAVANJU FINANSIJSKOG PLANA JAVNE USTANOVE “SLUŽBA ZA ZAPOŠLJAVANJE KANTONA SARAJEVO“ SARAJEVO ZA 2023. GODINU**

Zastupnici su materijal za ovu tačku dobili u dopunskom materijalu. Uvodno izlaganje u ime Predlagača je podnijela Edina Ljubuškić, v.d. direktorica JU „Službe za zapošljavanje KS“.

Pitanja su postavili zastupnici: Haris Zahiragić, Muamer Bandić, Marijela Hašimbegović, Mahir Dević, Vildana Bešlija, Mersiha Mehmedagić, Davor Čičić i Samir Avdić, na koja im je odgovorila v.d. direktorica Ljubuškić.



U diskusiji, koju je potom otvorio predsjedavajući, učešće su uzeli zastupnici: Irfan Čengić, Mahir Dević, Jelena Pekić, Davor Čičić, Haris Zahiragić, Muamer Bandić, Elvis Vreto, Marijela Hašimbegović i Jasmin Šaljić.

Po zaključenu diskusije, predsjedavajući je pozvao zastupnike da se izjasne o Prijedlogu odluke.

*Skupština je jednoglasno (26 „ZA“) donijela Odluku o davanju saglasnosti na Financijski plan Javne ustanove Služba za zapošljavanje Kantona Sarajevo za 2023 godinu sa Odlukom o izvršavanju finansijskog plana Javne ustanove Služba za zapošljavanje Kantona Sarajevo za 2023. godinu.*

Realizacija tačke jedanaest.

AD-11.

**PRIJEDLOG ODLUKE O POSTOJANJU JAVNOG INTERESA ZA OSNIVANJE JAVNE USTANOVE OSNOVNA ŠKOLA "ROSULJE" VOGOŠĆA.**

Zastupnici su ovaj materijal dobili u dopuni, uvodna izlaganja po istom podnijela je ministrica za odgoj i obrazovanje Naida Hota-Muminović.

Nije bilo prijavljenih zastupnika ispred skupštinskih radnih tijela, niti za postavljanje pitanja, a u diskusiji su učestvovali zastupnici: Mahir Dević i Muamer Bandić.

Zaključivši diskusije predsjedavajući je pozvao zastupnice i zastupnike da se izjasne o navedenom Prijedlogu odluke.

*Skupština je jednoglasno (26 „ZA“) donijela Odluku o postojanju javnog interesa za osnivanje Javne ustanove Osnovna škola "Rosulje" Vogošća.*

*Realizacija tačke dvanaest.*

AD-12.

**PRIJEDLOG ODLUKE O OSNIVANJU PRIVATNE SREDNJE ŠKOLE POD NAZIVOM - PRIVATNA MEĐUNARODNA GIMNAZIJA QSI INTERNATIONAL SCHOOL OF SARAJEVO – QSI MEĐUNARODNA KVALITETNA ŠKOLA SARAJEVO**

Prijedlog odluke je dostavljen zastupnicima u dopunskom materijalu, a u ime Predlagača uvodno izlaganje je podnijela ministrica za odgoj i obrazovanje Naida Hota-Muminović.

Na pitanja koja su postavili zastupnici: Mahir Dević, Haris Zahiragić i Marijela Hašimbegović ministrica je odgovorila.

Predsjedavajući je potom otvorio diskusiju u kojoj su učestvovali sljedeći zastupnici: Haris Zahiragić, Irfan Čengić, Marijela Hašimbegović, Mahir Dević, Samir Avdić, Elvis Vreto, Muamer Bandić i ministrica Naida Hota-Muminović.

Po zaključenju diskusije predsjedavajući je pozvao zastupnike da se izjasne o Prijedlogu odluke.

*Konstatovano je da je Skupština većinom glasova (18 „ZA, niko protiv i 7 „suzdržanih“) usvojila navedenu Odluku, na što je zastupnik Mahir Dević izrazio sumnju u glasanje i zahtijevao pojedinačno izjašnjavanje zastupnika.*

Sekretarka Skupštine, Aida Zeković, je izvršila pojedinačno prozivanje zastupnika koji su se izjasnili.

*Nakon sumiranja rezultata pojedinačnog glasanja predsjedavajući je konstatovao da je Skupština većinom glasova (18 „ZA, niko protiv i 8 „suzdržanih“) usvojila Odluku o osnivanju privatne srednje škole pod nazivom - Privatna međunarodna gimnazija QSI International School of Sarajevo – QSI Međunarodna kvalitetna škola Sarajevo.*

Realizacija tačke trinaest.

AD-13.

PRIJEDLOG ODLUKE O DAVANJU SAGLASNOSTI NA PRIJEDLOG UGOVORA O ZAKUPU POSLOVNOG PROSTORA POSLOVNE ZGRADE KJP CENTAR “SKENDERIJA” D.O.O. SARAJEVO KOJI ZAKLJUČUJU MINISTARSTVO SAOBRAĆAJA KANTONA SARAJEVO I KJP CENTAR „SKENDERIJA“ D.O.O. SARAJEVO.

Materijali za ovu tačku dnevnog reda su dostavljeni zastupnicima u dopuni. Uvodno izlaganje po ovoj tački podnio je pomoćnik ministra saobraćaja Tarik Bašović.

Na pitanja koja su postavili zastupnici: Haris Zahiragić, Mahir Dević i Marijela Hašimbegović, pomoćnik ministra Tarik Bašović je dao odgovore.

Potom je otvorena diskusija u kojoj su učestvovali zastupnici: Mahir Dević, Vibor Handžić, Haris Zahiragić, Elvis Vreto, Samir Avdić, Miomirka Melank, Vildana Bešlija, Adi Kalem, Marijela Hašimbegović i Jasmin Šaljić.

Po zaključenju diskusije predsjedavajući je pozvao zastupnike da se izjasne.

*Konstatovano je da je Skupština većinom glasova ( 19 „ZA“, protiv niko i 5 „suzdržanih“) donijela Odluku o davanju saglasnosti na Prijedlog ugovora zakup poslovnog prostora, poslovne zgrade Kantonalnog javnog preduzeća Centar Skenderija doo Sarajevo, koji zaključuju Ministarstvo saobraćaja Kantona Sarajevo i Kantonalno javno preduzeće Centar Skenderija d.o.o. Sarajevo.*

Predsjedavajući je potom konstatovao da su iscrpljene sve tačke dnevnog reda nastavka Četvrtre radne sjednice, te je zaključio rad na istoj i zahvalio se zastupnicama i zastupnicima na radu.

Zapisnik izradila:

Lejla Kadrić

**SEKRETAR**

**SKUPŠTINE KANTONA SARAJEVO**

**Aida Zeković**

**PREDSJEDAVAJUĆI**

**SKUPŠTINE KANTONA SARAJEVO**

**Elvedin Okerić**

**Sastavni dio ovog zapisnika su stenografske bilješke, audio snimak sjednice, koji se čuvaju u Službi za skupštinske poslove Skupštine Kantona Sarajevo.**